

BHIHITA META'A NEBUHINO

MARKUS

Kaatono Wamba

Bhihita Metaa aini nobuhie Markus. Ane doangkafi tula-tula pata tibuhino, Markus noposabhangka'ao Petrus weo folele'ano Bhihita Metaa, dadi'anomo sabhaha nefetingkeno ne Petrus nebuhihino dua ne kitabi aini. Ambado do buhie we kotano Roma. Padamo dua noposabhangka bhe Paulus bhe Barnabas (Tul 13:1-13). Kiha-kiha Markusmo dua ini ana'i mo'ane milei kalembi-lembe wakutuu dohako Yesus (14:51-52).

Kabuhino notandakie peda aini: "Ainimo Bhihita Metaa metula-tula'aono Yesus Kristus, Anano Lahata'ala." Markus nofotiwoha putae Yesus kotu-kotu'u Mesias Omputo Fosalamatino, Anano Lahata'ala (1:1,11,24; 3:11; 5:7; 8:29; 9:7; 14:61-62; 15:39).

Markus nofotiwoha kaitae dua peda amai kabhalano kuasano Yesus nofofoina'u, nefeka'osa mie mosaki, bhe ne'amponi dhosa. Weo kitabino ini Markus nefosibhala mpuu nehabuno Yesus, noliu'e wambano kafoina'uno. Patudhuno dua kitabi aini namekamatangka lalontoomu mie marasaeano, damangkafi Yesus o ae maka dua so newisekintoomu (8:34-38; 10:29-31).

Yohanes Fokadiuno

1:1-8

Mat 3:1-6, 11-12;

Luk 3:3-6, 15-17; Yoh 1:19-28

1 Ainimo Bhihita Metaa metula-tula'aono Yesus Kristus, Anano Lahata'ala. ²Kafetompuna'ino Bhihita Metaa ini peda tibuhino weo Kitabino anabii Yesaya peda aini,

“Ambano Lahata'ala, 'Anoamo ini katuduku,
atudue nama'induluangko, naebhongkaangko
kaangka'a.’

³ Nandoo suaha mekei-keino we pandaso bhalano ambano,
‘Mebhongkaomu kaangka'a so Ompu;
fekalaa'eomu so kaangka'ano.’ ”^a

^a 1:2-3 Mal 3:1; Yes 40:3

⁴Pedamo tibuhino na'a Yohanes Fokadiuno notiumba we pandaso bhalano bhe nopugau ambano, “Fetompa'ao dhosamiau, doliomu ne Lahata'ala bhe mefekadiu'omu maka Lahata'ala na'umamponikoomu.” ⁵Pada aitu kosekadie'ae Yudea bhe miendo kotano Yerusalem dosipumpumo dokala we Yohanes. Detula-tulamo do'akui dhosando maka nokadiuda Yohanes we umelena Yordan.

⁶Pakeano Yohanes ini wuluno unta, kagegeno o kuli.^a Nehumaa-no o kapunda bhe golano kainiua. ⁷Nefolele bhihita peda aini, “Namada idi nahumato seemie moliu kanau kuasa; alumongko alumense katapuno kaampini ne a'eno paise amantasia. ⁸O idi akadiuangkoomu oe, tamaka ane nahumato Anoa nakumadiuangkoomu Rohino Lahata'ala.”

Yohanes nokadiu Yesus

1:9-11

Mat 3:13-17;

Luk 3:21-22; Yoh 1:32-34

⁹Wakutuu aitu nohatomo Yesus nomai'ao we liwuno Nasaret, we kadieno Galilea, maka nokadiu'e Yohanes we umelena Yordan. ¹⁰Safonino nomai'ao weo umele, Yesus nowohamo lani nomoengka, maka Rohino Lahata'ala nosampu te potala'ano nokatu fute'o. ¹¹Notifetingkemo dua suaha nomai'ao te lani ambano, “Hintumo Anaku timoasi'aono, Hintumo meka'iano laloku.”

Yesus nosobae Kafeompu'ando seetani we pandaso bhalano

1:12-13

Mat 4:1-11; Luk 4:1-13

¹²Pada aitu Yesus lasao nofokalae Rohino Lahata'ala we pandaso bhalano. ¹³Fato fulu'a kaomponano neate we pandaso bhalano na'a bhe nosobae Kafeompu'ando seetani. Anoa neate ne na'a nopobhai bhe sabhaha kadadi fohumaano, tamaka dodamba'aane mala'ekati.

Yesus noumba we Galilea

1:14-15

Mat 4:12-17; Luk 4:14-15

¹⁴Notitohongku kaowu Yohanes, Yesus nokalamo we Galilea. Nefolele Bhihita Metaa mai'aono ne Lahata'ala. ¹⁵Ambano, “Nohatomo tempono, noma'omo Kafopahinta'ano Lahata'ala. Fetompa'ao dhosamiau, doliomu ne Lahata'ala bhe parasaea'omu ne Bhihita Metaa!”

^a 1:6 Pakeano Yohanes nopototo bhe pakeano anabii Elia; 2Raj 1:8

Pakatandano Yesus nesali'i anaguhuno

1:16-20

Mat 4:18-22; Luk 5:1-11

¹⁶Tangasano Yesus nekala-kala nosohaki wiwino te'ino Galilea, gaha'a nowohamo Simon bhe Andreas kakuta'ano. Andoa maitu tangasano debuani mba'inomo andoa ini pande kenta. ¹⁷Yesus nosali'idamo ambano, "Maimoomu angkafi kanau'omu, amoguhukoomu so mebuanino manusia." ¹⁸Andoa maitu lasao dohunsa buanindo maka doangkafi Yesus.

¹⁹Miina'o nakodo'o nokala, Yesus nowohamo dua Yakobus bhe Yohanes ana'ino Zebedeus tangasano dofekataa'i pukando weo bhangka. ²⁰Yesus lasao nosali'ida dua. Kohoduando tadohunsamo amando Zebedeus bhe mie gumadhino weo bhangka maka doangkafie.

Yesus nofolimba seetani weo lambu kasambahe'a

we Kapernaum

1:21-28

Luk 4:31-37

²¹Yesus bhe mie mangkafie dohatomo we liwuno Kapernaum. Sahatono oleono Sabat, Yesus lasao nopesua weo lambu kasambahe'a maka nofofoina'u. ²²Mie metingkeno kafoina'uno domente sepali'a, mba'inomo nofoina'uda peda seemie kokuasano, nopo'ala bhe pande-pande Kitabi.

²³Gaha'a weo lambu kasambahe'a na'a tanonandoomo dua seemie nepesuakino seetani. O mie aitu nokeimo ambano, ²⁴"O Yesus miendo Nasaret, o ae patudhumu ne insaodi ini? Mai mobinasa kainsami gaha'a? Apande'aangko, Hintu itu mie mongkilono katuduno Lahata'ala." ²⁵Tamaka Yesus nohandapi seetani maitu ambano, "Koise mohobhoa, limba'o toha mai'ao ne mie aini!" ²⁶Seetani nogegohao mie aitu maka nolimba bhe nopokakei-kei. ²⁷Kosasawindo mie nopuli mentendo, sampe dopofee-feena ambado, "O ae gaha'a inia? Se'ise kafoina'u bu'ou. Pugauno nopono'ao kuasa. Mahingga o seetani deangka ne pahintano." ²⁸Pada aitu bhihitano ini nehimba sepali'a nolele ne koseka'ewa'ae kadieno Galilea.

Yesus nofeka'osa ponია hobhineno Simon bhe mie sigao'ano dua

1:29-34

Mat 8:14-17, Luk 4:38-41

²⁹Salimbando domai'ao ne lambu kasambahe'a, Yesus, Yakobus bhe Yohanes dokala se lambudo Simon bhe Andreas. ³⁰Ponia

hobhineno Simon nandoo nendole-ndole mba'inomo nosodoe. Sapesuano weo lambu, Yesus lasao dofohatoane sakino kamungkula amaitu. ³¹ Yesus nokalamo se kaodo'ano, nointahamo limano maka nofowanue. Gaha'a sodono tanosipada'amo. Hobhine aitu lasao netaganaanda daomaa.

³² Kama'oleomo dua ana'a, nosoo kaowu oleo, dehatoanemo mie mosakino bhe mie nepesuakino seetani weo liwu. ³³ Dadi'ano-mo mieno liwu dowolo dofo'onu wutondo ne wiseno fointo. ³⁴ Alo amaitu dobhahi sepali'a mie meepesino sabhaha saki nefeka'osano, dobhahi dua seetani nefolimbano. Seetani andoa na'a miina namotolalada dopugau, mba'inomo andoa dopande'aane la'ae Yesus maitu.

Yesus nofofoina'u we liwu sigao'ano

1:35-39

Luk 4:42-44

³⁵ Sanimentae sepali'a, nandoo nohohondo, Yesus nowanumo maka nolimba we simbalino liwu. Nokalamo nosambaheha te molino'ano. ³⁶ Gaha'a Simon bhe sabhangka'ino dokalamo do'ondofie. ³⁷ Hato dopo'awaane dopugaumo ambado, “Guru! Kosasawindo mie do'ondofiko.”

³⁸ Yesus tanotobhoosida ambano, “Dopansuhuaanomu we liwu sigao'ano ne owano ini, neanomo aefolele dua Bhihita Metaa ne watu, kapa'amo aitu'aemo patudhuno kahato'aku.”

³⁹ Pada aitu Yesus nolilimo we kadieno Galilea, nefolele Bhihita Metaa weo lambu-lambu kasambaheha'ando bhe nefolimba seetani.

Yesus nefeka'osa kokuli modaino

1:40-45

Mat 8:1-14; Luk 5:12-16

⁴⁰ Nandoo seemie kokuli modaino nomai notaohao sombano ne wiseno Yesus. Mie aitu nefetulumi ambano, “Ane umunda, tetewei naembali meka'osa kanau.”

⁴¹ Hampano nobhela lalono, Yesus nofonsoho limano maka nofedampae bhe nopugau, “O Idi a'unda, mo'osa'o toha.” ⁴² Ne olotano namu-namu tanosimo'uhi'amo kuli modaino, uluno nonggelamo. ⁴³ Mie aitu lasao notudue nakumala bhe nofodhagae ambano, ⁴⁴ “Tandai'e fekataa-taa, koise mekapu-kapunaa ne la'ae-la'aemoa, ampamo kaowu, kalamo fotiwoha wutomu ne imamu. Namada ana'a, kapa'amo mo'osamo, kalamo meowa dua kapopanga so

Lahata'ala peda neowili'aono anabii Musa, so netandaindo mie bhahi putae hintu mo'osamo.”^a

⁴⁵Tamaka mie aitu nolili netula-tula'ao kadhadhia amaitu, sampe Yesus miinamo naembali namesua weo liwu ane dowohae mie bhahi. Yesus taneatemo we molino'ano. Tamaka mie bhahi mai'aono ne sabhaha liwu sadhia domai'ie dua.

Mie kalu dofeka'osae

2:1-12

Mat 9:1-8; Luk 5:17-26

2 Miina naompona nopalusi ana'a, Yesus nosulimo toha we Kapernaum. Bhihita kahato'ano we lambu lasao dofetingkee mieno liwu. ²Pada ana'a mie bhahi dosipumpumo toha se lambuno, sampe miinamo namuleadaa weo lambu; mahingga te wiseno fointo nopono'ao mie. Yesus nofohatoanda bhoasaono Lahata'ala. ³Nandoo nofofoina'u maitu, dehatoanemo seemie kalu do'owea'e dopopaa. ⁴Hampano kabhahindo mie, andoa miina dalumapa daowa mie kalu aitu se Yesus. Dadi'anomo dealimo ato te potala'ano Yesus maka dofosampu mie kalu aitu ne wiseno. Tadofosampumo bhe kati'owea'ano. ⁵Nowoha kabhalano kaparasaeando, Yesus nopugaumo ne mie kalu aitu, “Anaku, dhosamu noti'amponimo!”

⁶Ne itu nandoo dua pande-pande Kitabi dengko-ha-ngko-ha. Andoa maitu dokaduku we lalondo, ⁷“Noafa mie aini nopugau'ao peda amaitu? Ingka nofeka'aebu Lahata'ala, nopototo'ao wutono bhe Lahata'ala! La'ae gaha'a so me'amponino dhosa ane paise wutono Lahata'ala?”

⁸Tamaka Yesus lasao nopande'aane nefekihindo, maka nopugau ambano, “Noafa gaha'a kofekihia'ao'omu peda aitu? ⁹O ae so kalandaino akokuasa? Apugau'ao ‘Dhosamu noti'amponimo’, bhaha'i apugau'ao ‘Wanumo, sangke kati'owea'amu maka mekala-kala?’

¹⁰Amotiwohaangkoomu Idi ini – Anano Manusia – akokuasa ae'ampuni dhosa te dhunia ini”, maka Yesus nopugau ne mie kalu aitu,

¹¹“Wanu'o toha, sangke kati'owea'amu maka suli se lambumu!”

¹²Mie kalu aitu nowanumo, lasao notongku kati'owea'ano sa'ituini maka nolimba. Kosasawindo mie humatono dowohae kadhadhia amaitu. Mie andoa na'a domente sepali'a bhe dopudhi Lahata'ala ambado, “Kane'omo aitu dowohaomu kadhadhia medando aini.”

^a 1:44 Im 14:1-32

Lewi meala'ino sewa noangkafi Yesus**2:13-17***Mat 9:9-13; Luk 5:27-32*

¹³Pada aitu Yesus nokala toha se wiwino te'ino Galilea. Dobhahi mie po'awaane, maka Yesus nofoina'uda. ¹⁴Wakutuuno nolalo ne wiseno kantorino sewa, nowohamo Lewi anano Alfeus nengkohangkohi we lalo. Yesus nopugaumo ne Lewi, "Mai, angkafimo Idi!" Pada aitu Lewi noehemo maka noangkafie.

¹⁵Wakutuuno nohumaa se lambuno Lewi, dobhahi dua mie mesalono sewa bhe mie kodhosa dopombali-mbali bhe Yesus bhe anaguhu'ino, kapa'amo dobhahi mangkafie. ¹⁶Nandoo dua pandepande Kitabi mai'aono ne kaomundo Farisi. Dowoha kaowu Yesus nopombali bhe mesalo'ino sewa bhe kodhosa'ino maitu, dofeenamomo ne anaguhu'ino ambado, "Peda ae gaha'a, ingka gurumiu nopombali bhe mie kodhosa maitu?"

¹⁷Yesus nofetingkeda, maka nopugau ne andoa ambano, "Mie metaano namisi miina naefaraluu foagono, mpahinomo mie mosaki. Pedamo dua Idi, hatoku ini miina ae'ondofi mie mongkilono, tamaka ae'ondofi mie kodhosano."

Kafoina'uno Yesus nopo'ala bhe kafoina'u ngkodau**2:18-22***Mat 9:14-17; Luk 5:33-39*

¹⁸Sewakutuu anaguhu'ino Yohanes bhe miendo Farisi nandoo dopoasa, domaino mie dofeena Yesus ambado, "Noafa gaha'a anaguhu'ino Yohanes bhe anaguhu'indo Farisi dopoasa'ao, tamaka anaguhu'imu miina?"

¹⁹Notobhoosi Yesus ambano, "Naembali bhahaa sabhangka'ino lo'ia bu'ou daguguhu tangasano nopobhaianda lo'ia bu'ou? Tantu-mo paise. ²⁰Tamaka nahumato tempono, lo'ia bu'ou dawowo'oemo. Ne na'a kane'omo damoasa.

²¹Ane detabha nggasi, miina bhe mepakeno kabhini bu'ou pata'ou mokuhuno. Kapa'amo kabhini medano aitu nahumela nggasi maitu, sampe nadhumulu kabhensino. ²²Pedamo dua na'a, miina nandumandooa mie mefosingi'ino angguru bu'ou ne kaentei'a katembuno,^a kapa'amo ane nada na'a so kaowu naowengka'ao kaentei'ano. Angguruno nabinasa, kaentei'ano nahumansuru. Tamaka angguru bu'ou tetewei datumei'e dua ne kaentei'a bu'ou."

^a **2:22** Kaentei'a katembuno, sakotu'uno: *kadu kangkodauno mai'ao ne bhalulano kadadi.*

Anaguhu'ino Yesus detobhe gandum ne oleono Sabat

2:23-28

Mat 12:1-8; Luk 6:1-5

²³Sewakutuu ne oleono Sabat, Yesus bhe anaguhu'ino dolalomo weo kaampono gandum. Gaha'a anaguhu'ino detobhemo wunano gandum seendai [so daomaa]. ²⁴Miendo Farisi dofeenamo ne Yesus ambado “Noafa gaha'a anaguhu'imu dokangkala'iao pahintano agamantoomu? Noafa gaha'a dehabu'ao giu nefalia ne oleono Sabat?” [Patudhundo damo'alae.]

²⁵Yesus notobhoosida peda aini, “Peda ae gaha'a? Miina'o basae'omua gaha'a nehabuno Daud wakutuuno Abyatar nembali Imamu Bhalano? Ingka wakutuu ana'a Daud bhe mangkafie do'ahomo tamaka miina dako'otia. ²⁶Daud nopesuamo weo Lambuno Lahata'ala maka nohumaa roti kapopanga so Lahata'ala. Roti aitu nodawu-dawuandae dua mie mangkafie. Weo pahintano agamantoomu roti ana'a o falia dohumaa'e mie sigao'ano, mphahinomo imamu.”^a

²⁷Pada aitu Yesus nopugaumo toha ambano, “Oleono Sabat nofokonandoo'e Ompu so damewule'ao manusia, miina namonkonandoo manusia so mangkafino atorano oleono Sabat. ²⁸Idi, Anano Manusia, akokuasa, dadi'anomo akokuasa dua amotantu atorano oleono Sabat.”

Yesus nefeka'osa mie ne oleono Sabat

3:1-6

Mat 12:9-14; Luk 6:6-11

3 Palusi ana'a Yesus nopesuamo toha weo lambu kasambahea'a. Ne itu nandoo seemie nokepe limano sembali. ²Nandoo dua mie moti-motindano Yesus, bhaha'i kaowu mie amaitu nameka'osae dua ne oleono Sabat; patudhundo damo'alae. ³Yesus nopugaumo ne mie mokepeno lima maitu ambano, “Mai, meehe-ehe te wise ini!” ⁴Pada aitu Yesus nofeenadamo ambano, “Weo tubhono agamantoomu nembali dehabu ae gaha'a ne oleono Sabat? Habu metaa kaa habu modai? Dafofodadi kaa dafopongko?” Tamaka andoa maitu miina dakodiua.

⁵Yesus no'amaha poowa nofolilianda matano, tamaka nobhela-anda dua lalono hampano katu'ano fotundo. Pada aitu nopugaumo

^a 2:26 1Sam 21:1-6; Im 24:5-9

ne kepe sa'ituini ambano, “Fonsoho limamu!” Mie aitu nofonsoho limano, gaha'a lasao no'osa. ⁶Pada ana'a miendo Farisi maitu dolimbamo, lasao dokala dopugau-gau bhe mieno kolaki Herodes so damongko'ao Yesus.

Dobhahi mie nefeka'osano Yesus

3:7-12

⁷Yesus bhe anaguhu'ino dofogaati wutondo we wiwino te'ino Galilea. Dobhahi sepali'a mieno Galilea mangkafino Yesus. Dobhahi dua mai'aono we kadieno Yudea, ⁸mai'aono we Yerusalem, mai'aono we kadieno Idumea, mai'aono we sewetano umelena Yordan, bhe mai'aono dua we kadieno Tirus bhe Sidon. Kahato'ando mie bhahi ini, mba'inomo dofetingke sabhaha giu nehabuno Yesus. ⁹Yesus notudumo anaguhu'ino daefontaa-ntaa'ane bhangka so kasawi'ano, kapa'amo o mie dobhahi sepali'a, bhahaa dodhumpuhaane. ¹⁰Nobhahi sepali'a nefeka'osa mie mosakino, sampe mie mosakino dopodhumpu-dhumpuhao doma'oti Yesus dakumadampae'ao. ¹¹Taenomo mie nepesuakino seetani dowoha Anoa, dosudhu ne wiseno bhe dokei, “Hintumo Anano Lahata'ala.”

¹²Tamaka Yesus no'ele'aanda sepali'a seetani andoa na'a damohato mie sigao'ano, bhaha'i la'ae Anoa maitu.

Yesus nepili doompulu hodua anaguhu'ino

3:13-19

Mat 10:1-4; Luk 6:12-16

¹³Pada ana'a Yesus nofonimo te kabhawo, maka nosali'i mie so nepilino. Andoa na'a dokalamo se Anoa, ¹⁴maka nefotantu doompulu hodua so pobhaiiane. Andoa ini notududa daefolele Bhihita Metaa. ¹⁵Yesus nowa'anda dua kuasa daefolimba seetani.

¹⁶Neando anaguhu nepilino ompulu hoduano maitu: Simon, nokonae dua Petrus, ¹⁷Yakobus, anano Zebedeus, bhe Yohanes kakuta'ano Yakobus, andoa ini nokonada dua Boanerges, ma'anano domansolumbu,^a ¹⁸Andreas, Filipus, Bartolomeus, Matius, Tomas, Yakobus anano Alfeus, Tadeus, Simon miendo Zelot,^b ¹⁹bhe Yudas Iskariot. Anoamo ini mowano Yesus ne limando kaewa.

^a 3:17 Ma'anano Boanerges sakotu'uno “anano guntu”.

^b 3:18 Miendo Zelot na'a dokopatudhu damobebasi witenno Israel mai'ao ne kafopahinta'ano Roma.

Yesus dosangkatie nepake kuasano seetani

3:20-30

Mat 12:22-32; Luk 11:14-23

²⁰Nopalusi ana'a Yesus nosulimo se lambu. Mie bhahi domaimo toha dopofo'o-fo'onu, sampe Yesus bhe anaguhu'ino miinamo datolala daomaa. ²¹Dofetingke peda ana'a, domaimo bhahitie'ino damalae, kapa'amo ambado, “Ingka nobheemo.”

²²Pande-pande Kitabi mai'aono we Yerusalem dopugaumo dua ambado, “Anoa ini nopesuakiemo Beelsebul, Kafeompu'ando seetani. Dadi'anomo ane nefolimba seetani nepake kuasano Kafeompu'ando seetani.”

²³Yesus nosali'imo mie bhahi maitu, maka nopugau nepake-anda kapalenda. Ambano, “Nameda amai gaha'a Kafeompu'ando seetani naefolimba seetani? ²⁴Ane mie neowano seemie omputo pae dase'ise, liwu aitu pae natumahaa. ²⁵Pedamo dua aitu, ane mie weo lambu se'onu pae dase'ise, tamaka sadhia dapogiha-giha, polambu aitu pae natumahaa. ²⁶Ane Kafeompu'ando seetani namewangi wutono, o seetani dapowea-ewangi, teteweimo kuasano seetani pae natumahaa, naosalimo.

²⁷Pae naembali daepesuaki lambuno mie mo'osa darumampasi arataano, ane pae datumapu kadeki kolambuno. Mada datumapue, makane'o naembali darumampasi arataano.

²⁸Amohatokoomu, kotu-kotu'u kosasawi'ae dhosa bhe sabhaha kafeka'aebundo manusia, naembali nati'amponi. ²⁹Tamaka ane dofeka'aebu Rohino Lahata'ala, pae sepali'a nati'amponia. Kapa'amo kafeka'aebu medando aitu, dhosa suhue dhamani.” ³⁰Kapugau'ano peda na'a mba'inomo nandoo mugauno, “Anoa ini nopesuakie seetani.”

Inano bhe bhahitie'ino Yesus

3:31-35

Mat 12:46-50; Luk 8:19-21

³¹Pada ana'a dohatomo inano bhe bhahitie'ino Yesus. Andoa deehe-ehe we simbalino lambu, maka detudu mie dalumo'oi Yesus. ³²Wakutuu ana'a dobhahi mie mengkoha-ngkohano dolibu-libue. Ambado mie maitu, “Guru, inamu bhe bhahitie'imu we simbalino lambu, do'ondofiko.”

³³Yesus tanotobhoosida ambano, “La'ae gaha'a inaku? La'ae bhahaa bhahitie'iku?” ³⁴Nofolilimo matano ne mie lumibu-libue

maitu maka nopugau, “Aini'adamo inaku bhe bhahitie'iku. ³⁵La'ae-la'ae meangkano ne pahintano Lahata'ala, anoamo itu bhahitieu mo'ane, bhahitieu hobbhine, anoamo itu dua inaku.”

Kapalendano me'ewino wine

4:1-9

Mat 13:1-9; Luk 8:4-8

4 Yesus nofofoina'u toha we wiwino te'ino Galilea. Dobhahi sepali'a humatono dolibu-libue. Dadi'anomo, nosawimo ne se'onu bhangka [melanto-lantono ne itu] maka nengkoaha, tamaka mie bhahi deehe-ehe te wite. ²Nobhahi kafoina'uno nepakeanda kapalenda. Ambano peda aini.

³“Soba fetingkeomu! Nandoo seemie mekaampono nokala ne'ewi wine. ⁴Tangasano ne'ewi, nandoo wine mondawu'ano ne kaangka'a. Gaha'a dohatomo ka'uhi lumola, dopadae dohumaa'e. ⁵Nandoo dua mondawu'ano ne kamo'ali, witeno miina naokapaa. Wine aitu nopikitumbu, mba'inomo nonifi witeno. ⁶Tamaka hato nopana oleo, tumbuno noleleumo, lasao nomate, kapa'amo pahakano miina nakumamaa. ⁷Nandoo dua wine mondawu'ano weo kahoku kokihi. Kahoku kokihi aitu nodhulu kabhala maka no'onti'i kantisa ana'a sampe miina nakobhakea, tanomate. ⁸Tamaka nandoo dua mondawu'ano ne wite menowu. Nokesa endeno, maka hasilino nobhahi sepali'a. Nandoo tolu fulu onuno sewili, nandoo nomo fulu, nandoo dua mo'ono onu.”

⁹Ambano toha, “Ane dokotingala, beano dametingke.”

Tingkuno Yesus nepake kapalenda

4:10-12

Mat 13:10-17; Luk 8:9-10

¹⁰Tangasano Yesus tanomoisa, domaimo mie mangkafie bhe anaguhu'ino ompulu hoduanu, dofeena'ao ma'anano kapalenda sal'ituini. ¹¹Yesus notobhoosida ambano, “Hintimiu nowa'angkoomu dawua Lahata'ala pande'aanemoomu rahasioano Kafopahinta'ano. Tamaka mie sigao'ano aepakeanda kapalenda, ¹²neanomo

‘mahingga da'umondo-ondoe, paise damohae;

mahingga dametingke paise dalumosangiea.

Kanandoo'ano peda ana'a keana dodoli ne Lahata'ala,

keana dua no'amponida.’ ”^a

^a 4:12 Yes 6:9-10

Ma'anano kapalenda me'ewino wine

4:13-20

Mat 13:18-23; Luk 8:11-15

¹³Yesus nopugaumo toha, “Miina'o mande'aaneomua gaha'a ma'anano kapalenda sa'ituinia? Ane peda ana'a, nada amai gaha'a melosangiomu kapalenda sigao'ano? ¹⁴Me'ewino wine na'a, ma'anano o mie mefoleleno bhoasaono Lahata'ala. ¹⁵O wine mondawu'ano ne kaangka'a, ma'anano mie metingkeno bhoasaono Lahata'ala maitu. Tamaka kane'o pada dofetingkee, nomaimo Kafeompu'ando seetani, lasao noala bhoasao kane'o ne'ewi weo totono lalondo maitu. ¹⁶Wine mondawu'ano ne kamo'ali, ma'anano mie metingkeno bhoasaono Lahata'ala, lasao dotahimae bhe do'ia'ane. ¹⁷Ampamo kaowu bhoasao aitu miina nakopahakaa weo totono lalondo, sampe miina natumahaa. Sade'awa kasabha bhaha'i kakadee-dee mba'inomo doangkafi bhoasao aitu, lasao dohunsae kaparasaeando. ¹⁸Wine mondawu'ano weo kahoku kokihi, ma'anano mie metingkeno bhoasaono Lahata'ala. ¹⁹Tamaka nobhahi dofekihi so kadadi'ando, nobhohe-bhohe'ida dua kahangkaeano dhumia, pakade nobhahi kapoindalondo sigao'ano. Kosasawi'ae maitu nopesua weo totono lalondo, no'onti'i bhoasaono Lahata'ala, sampe miina nako-hasilia. ²⁰Maka o wine mondawu'ano ne wite menowu, ma'anano mie metingkeno bhoasaono Lahata'ala bhe dotahimae weo totono lalondo, sampe nokohasili. Nandoo tolu fulu, nandoo nomo fulu, sampe nandoo dua mo'ono lentu'a hasilino.”

Kapalendano kantalea

4:21-25

Luk 8:16-18

²¹Pada ana'a Yesus nofeenamo ambano, “Pada wohaomu bhahaa mesulano kantalea maka dosongkowiane kai'i bhaha'i dohunsae we pandano kaodo'a? Ingka o kantalea tetewei dohunsae te melangke'ano. ²²Kapa'amo kosasawi'ae tifebuni'ano sanea damotiumbae; sabhaha rahasia damekantalea'ie. ²³Dadi'anomo, ane dokotingala, beano dametingke.”

²⁴Yesus notudumi toha pugauno ambano, “Tandai'eomu nefetingkemiu ini! Ampa kawa'ao'amu ne mie bhaimu, aitu dua so ne'awamu mai'ao ne Lahata'ala, tadua natumubhahiangkomo. ²⁵Kapa'amo mie kokanandoono datumubhahiane, tamaka pata kokanandoono, o ae maka dua kanandoono damalae.”

Kapalendano tumbuno wine

4:26-29

²⁶Ambano toha Yesus, “Kafopahinta'ano Lahata'ala naembali dapototoane bhe mie me'ewino wine te kaampono. ²⁷Nohondo oleo giagi tanoodomo, nomentaea tanowanumo. O wine ne'ewino maitu tanodhampakamo, maka tanodhulu-dhulumo kabhala. Peda ae no'ende miina namande'aane. ²⁸O kantisa tanotumbu'aomo wuto-no mai'ao ne wite; kabhao-bhaono laano, pada na'a kunsalono maka onuno. ²⁹Pada aitu nokuni kaowu, dotobheemo mba'inomo nohatomo metobhe'a.”

Kapalendano onuno sau wonoita

4:30-34

Mat 13:31-35; Luk 13:18-19

³⁰Yesus nopugaumo toha ambano, “Kafopahinta'ano Lahata'ala maitu dapototoane bhe ae bhahaa? Damalendaane ae bhahaa so metaa'anoa? ³¹Kafopahinta'ano Lahata'ala tapedamo onuno sau wonoita se'onu^a nehoo ne wite. Onuno wonoita ini wine foliunomo kahobu ne dhunia ini. ³²Tamaka ane dohoo'e, no'ende nembali kantisa foliuno kabhala. Kabhala'ino ha'ano, sampe kaluno nembali dofekaufeane ka'uhi lumola.”

³³Nobhahi kapalenda medando sa'ituini nepakeno Yesus weo kafoina'uno, ampa hato'ano fekihindo mie bhahi. ³⁴Dadi'anomo ane nefoina'u mie bhahi, sadhia nepalendaanda. Tamaka ane tano-moisa bhe anaguhu'ino, kosasawi'ae nofohatoandae bhe ma'anano.

Yesus nefoonto kawea mo'osa

4:35-41

Mat 8:23-27; Luk 8:22-25

³⁵Ne oleo ana'a, nepanda kaowu oleo, Yesus nopugaumo ne anaguhu'ino, “Maimo dopolimbaanaomu we sewetano.”

³⁶Dadi'anomo anaguhu'ino dohunsamo mie bhahi te wite, dosawimo ne bhangka kaengkoha-ngkoha'ano Yesus sa'ituini, maka dobhose. Nandoo dua bhangka sigao'ano mangkafida. ³⁷Miina naomponaa dobhose, gaha'a nomaimo kawea mo'osa. Bhangkando nohambi-hambitaanemo ewo, sampe noi'i, noma'o naopono. ³⁸Yesus nandoo noodo we wana, nepake kanduula. Anaguhu'ino dofowanue ambado, “Guru, nada amai inia? Pae moheruane gaha'a dabinasaa?” ³⁹Yesus nowanumo, maka nowambaki kawea maitu

^a 4:31 Sakotu'uno: *onuno sawi*.

bhe nopugau ne oeno te'i, "Koe mohobhoa! Feonto'o toha!" Kawea lasao nofeonto, oeno te'i suli nolinto. ⁴⁰Pada aitu nopugaumo ne anaguhu'ino, "Noafa mote'i'ao'omu? Miina'o marasaea kanau'omu gaha'a?"

⁴¹Maka andoa dote'i sepali'a bhe dopugau sapada-pada andoa ambado "La'ae bhahaa anoa ini? Mahingga o kawea bhe te'i doangkafi pahintano!"

Yesus nefolimba seetani nomai'ao ne mieno Gerasa

5:1-20

Mat 8:28-34; Luk 8:26-39

5 Pada aitu Yesus bhe anaguhu'ino dohatomo we sewetano, we kadieno Gerasa. ²Ne itu Yesus nosampumo nomai'ao ne bhangka. Sasampuno, nopo'awaanemo seemie nepesuakino seetani nomai'ao se tombuno liano kafokobuhu'a. ³Mie amaitu neate weo lia kafokobuhu'a na'a. Miinamo damondoi'ea datumapue, mahingga datumapuane hante. ⁴Kapa'amo nentelamo dohantee bhe dolangkee, tamaka hanteno nobhotulie, langkeno nopuhokotie. Dadi'anomo miinamo bhe mondoi'e damotuhue. ⁵Mentae mohondo nolili weo lia bhe te kabhawo poangka nopokakei-kei, uluno nopepikiane kontu. ⁶Nowoha Yesus nandoo nokodo'o, notendehekiemo maka nosudhu bhe notaohao sombano. ⁷Mie aitu nokei nofekabhala-bhala, "Yesus Anano Lahata'ala kokuasano! O ae patudhumu ne idi ini? Weo neano Lahata'ala, koise fodee-dee kanau!" ⁸Kapugau'ano peda ana'a mba'inomo Yesus padamo nopugauane "Hei, hintu seetani! Limba'o toha mai'ao ne mie aini!"

⁹Yesus nofeenaemo ambano, "La'ae gaha'a neamu?" Notobhoo-simo ambano, "Neaku Legion, mba'inomo insaodi ini tabhahi." ^a

¹⁰Anoa nesalo mpuu ne Yesus ambano, "Koe tududa seetani ini dalumimba we simbalino liwu ini."

¹¹Miina nakodo'o bhe andoa maitu dobhahi sepali'a wewi kaneane tangasano doliwu te laano kabhawo. ¹²Maka seetani maitu desalomo ne Yesus ambado, "Tudu kainsami talumimba mai'ao ne mie aini, taesahangka'ao te wewi tatu!" ¹³Yesus no'undapida. Seetani na'a lasao dolimba domai'ao ne mie aitu maka dokala desahangka te gulumando wewi sa'ituini. Kabhahindo wewi aitu dapehaa hewu. Lasao dotende se wiwino pimpi, maka dololetimo wutondo weo te'i sampe dolomo.

^a 5:9 Ma'anano Legion: setagua tantara.

¹⁴Dhaga'ino wewi kakanea, maitu dofileimo bhe defolele bhihita we kota bhe liwu-liwu moma'o'ano. Mie metingkeno lasao dolimba da'umondo kumadhadhiano. ¹⁵Dohato ne Yesus dowohamo mie nepesuakino seetani sa'ituini nengkoha-ngkoha ne itu. Mie aitu bhemo pakeano bhe nopande'aomo lalono. Anoamo ini nepesuakino kantawundo seetani sa'ituini. Dadi'anomo mie humatono maitu dote'i. ¹⁶Mie moha'aono wuntano matano detula-tulaandamo kadhadiando mie nepesuakino seetani bhe wewi sa'ituini. ¹⁷Pada aitu gaha'a mieno liwu desalomo ne Yesus so napikihunsa'ao liwundo.

¹⁸Dadi'anomo Yesus nosawimo toha ne bhangka. Gaha'a mie nepesuakino seetani sa'ituini nesalo namangkafie. ¹⁹Tamaka Yesus miina na'umunda'aanea, tanopugaumo ambano, "Sulimo we lambumu! Fohatoda saliwumu peda ae kabhalano kaasino Ompu ne hintu, nehabuangko giu pata mentela."

²⁰Mie amaitu nosulimo bhe nefolele bhihita we kadieno Dekapolis. Netula-tula'aomo nehabuno Yesus ne wutono. Kosasawindo mie metingkeno dowolo damente.

Yesus nofodadi anano Yairus bhe nefeka'osa seemie hobhine

5:21-43

Mat 9:18-26; Luk 8:40-56

²¹Sahatono we sewetano, o mie bhahi dosipumpumo toha dolibu-libu Yesus. Nandoo'e we wiwino te'i, ²²gaha'a nohatomo seemie mande'aono lambu kasambahe'a weo liwu aitu, neano Yairus. Sanowoha Yesus, nolongkomo ne a'eno ²³bhe nesalo mpuu ambano, "Anaku hobhine nosaohi sepali'a sakino, ane naembali mai teiane limamu te wawono, no'osa'ao, keana nomate."

²⁴Pada aitu Yesus dosikala'amo bhe anoa. Mie bhahi dosipumpumo toha doangkafie bhe dopo'ua-ua ne sohihino.

²⁵Ne olotando mie bhahi maitu nandoo seemie hobhine mosakino, ompulu haa ta'umo nomai'ie wulano miina bhe katiehea.

²⁶Tanopadamo kanandoono nopoago ne sabhaha foagono, tamaka miina bhe kao'osa'anoa, sakino tanodhulu kasaohi. ²⁷Hobhine amaitu nobhahimo nofetingke bhihitano Yesus, dadi'anomo ne olotando mie bhahi maitu no'owatie nomai'ao we kundo. ²⁸Weo fekihino, "Mahingga ta'adumingku kaowu dhubano, ao'osamo."

²⁹Sanodingku dhubano maitu, notiehemmo hea nolimba, nonamisi we lalono no'osamo. ³⁰Yesus lasao nonamisi nandoo bhe kuasa lumimba'ano nomai'ao ne Anoa, maka nodoli ne mie bhahi

bhe nopugau ambano, “La'ae gaha'a dumingkuno dhubaku ini?”

³¹Dotobhoosimo anaguhu'ino ambado, “Ingka wohae mie do-po'ua-ua ne sohihimu, noafa dua feena'ao ‘La'ae dumingku kanau?’ ”

³²Tamaka Yesus nofolili matano no'ondofi la'ae dumingkue.

³³Nopande'aane kaowu no'osamo, hobhine aitu nofotiumba wuto-no, tamaka nohengkue kate'ino. Notaohaomo sombano ne wiseno Yesus maka netula-tula'ao kosasawi'ae kumadhadhia'ano ne uluno.

³⁴Ambano Yesus ne hobhine aitu, “Wa'ina, hampano kaparasaeamu ne Idi, mo'osamo. Sulimo, netaamo namisimu, mo'osamo kansuhu itua.”

³⁵Tangasano nopugau, dohatomo katudu domai'ao we lambuno Yairus ambado, “Nomatemo anamu, noafa nandoo dua damekasabha'ao Guru?”

³⁶Yesus miina naoheruane pugaundo mie maitu, maka ambano ne Yairus, “Koe tikendaa, taparasaeamo ne Idi!” ³⁷Yesus nopansuhumo, tamaka mie bhahi no'ele'aanda damangkafie, mpahinomo Petrus, Yakobus bhe Yohanes, kakuta'ano Yakobus. ³⁸Dohato se lambuno Yairus, Yesus nowohamo mie bhahi bhe nofetingke dohobho, do'ae bhe deka'ulei ampa kabhalano suahando. ³⁹Dopesua kaowu weo lambu, nopugaumo ne mie maitu, “Noafa gaha'a mohobho bhe meka'ulei'ao'omu? Ingka ana'i aini miina namatea, noodo kaowu.”

⁴⁰Dofetingke peda maitu andoa tadofuta-futaa'i. Tamaka Yesus notududa dalumimba we simbali maka noowa kamungkulano ana'i maitu bhe kototolundo anaguhuno dopesua weo boloku. ⁴¹Dohato weo bolokuno ana'i na'a, Yesus nointahamo limano bhe nopugau ambano, “*Talita kum,*” ma'anano, “Anaku, wanu'o toha!”

⁴²Ana'i aitu lasao nowanu maka nekala-kala. Umuhuno ompulu haa ta'umo. Mie mohano kadhadhia aitu nopuli mentendo. ⁴³Tamaka Yesus no'ele'aanda sepali'a daetula-tula'ao kadhadhia aitu malingga ne la'ae. Pada ana'a Yesus notududamo damakande ana'i aitu.

Yesus miina damarasaeae we Nasaret

6:1-6a

Mat 13:53-58; Luk 4:16-30

6 Nomai'ao ne itu Yesus nosulimo we liwuno, doangkafie dua anaguhu'ino. ²Nohato oleono Sabat nofofoina'umo toha weo lambu kasambahea'a. Mie bhahi domente dofetingke kafoina'uno.

Ambado, “No'awae ne amai bhahaa kapandeno maitua? Do-wa'ane dawua ae bhahaa mie aini? Peda ae nokokuasa nehabu giu timente'aono maitu? ³Ingka Anoa ini o tuka, anano Maria, bhahitie'ino ndo Yakobus, Yoses, Yudas bhe Simon. Bhahitie'ino hobhine deate dua ne ini.” Sampe nondidikiane lalondo.

⁴Tamaka ambano Yesus, “Seemie anabii sadhia dofosibhalae ne amai kakala'ano, simbali ne liwuno wutono, ne olotano bhahitie'ino bhe weo lambuno, miina damosibhalaea.”

⁵Ne liwuno na'a Yesus miina naembalia nehabu giu timente'aono, mpahinomo notei limano te wawondo seemie hodua mosakino lasao do'osa. ^{6a}Nomente mba'inomo miina damarasaea.

Yesus notudu anaguhu'ino dakumala daefolele

Bhihita Metaa

6:6b-13

Mat 10:5-15; Luk 9:1-6

^{6b}Pada ana'a Yesus nolilimo we liwu-liwu sigao'ano bhe no-fofoina'u. ⁷Nosali'imo anaguhu'ino koompulu hoduando maka no-tududa dakumala dahodua-hodua. Nowa'anda dua kuasa daefolimba seetani. ⁸Nofohatoda ambano, “Koe mewowo'oomu ae-ae, mpahinomo o katuko. Koe mewowo'oomu roti, bhaha'i kaduno bhaku, tawa o dhoi weo kawawemiu. ⁹Naembali mepakeomu kaampini ne a'emiu, tamaka koemo mewowo'oomu bhadhu nahaa tuwu.” ¹⁰Ambano toha, “Ane datumahimakoomu ne se'onu lambu, meateomu ne itu ampa humunsaomu liwu aitu. ¹¹Tamaka ane humatoomu ne se'onu liwu, maka mieno liwu aitu pae datumahimakoomu, dongahe dametingkekoomu, hunsae'omu liwu aitua. Mahingga bungahasi ne handano a'emiu tantae'omu, somo tandano kafodhagando.”

¹²Pada ana'a koompulu hoduando anaguhuno maitu doehemo. Dokalamo defolele bhihita putae manusia tabeano dametompa'ao dhosando bhe dadumoli ne Lahata'ala. ¹³Andoa maitu nobhahi defolimba seetani bhe mie mosakino dohbeluanda mina lasao do'osa.

Kamate'ano Yohanes Fokadiuno

6:14-29

Mat 14:1-12; Luk 9:7-9

¹⁴Kolaki Herodes nofetingke dua giu nehabuno Yesus, mba'inomo neano notiende-endemo ne amai liwu. Nandoo mugauno,

“Yohanes Fokadiuno nodadimo toha! Kakokuasa'anomo nehabu giu timente'aono!”

¹⁵Tamaka ambado sigao'ano, “Anoa ini anabii Elia!” Nandoo dua mugauno, “Anoa ini o anabii, nopototo bhe ana-anabii dhamani wawono.”

¹⁶Nofetingke peda na'a, Herodes nopugaumo, “Suano, mie ana'a teteweimo Yohanes Fokadiuno. Anoa itu padamo atompee wu'uno, gaha'a nodadimo toha!”

¹⁷Kanandoo'ano peda na'a, mba'inomo Herodes padamo netudu mie dahumako Yohanes, maka damopesua'e weo katohongku. Katitohongku'ano mba'inomo parakarano Herodias, mieno lambuno Filipus bhahitieno Herodes. Herodes ini noala dua Herodias mbali mieno lambuno. ¹⁸Yohanes nentuhumo nefe'ulaiane peda aini, “O falia mieno lambuno bhahitiemu alae dua so mieno lambumu!”

¹⁹Kaolea'anomo lalono Herodias ne Yohanes, sampe nokopatudhu namongkoe, tamaka miina namooliea. ²⁰Kapa'amo Herodes padamo netudu mie dadhumagani Yohanes, mba'inomo nomihikie, nopande'aane Yohanes maitu mie metaa, mie mongkilo. Ane nopugau Yohanes, noasiane dua nofetingkee mahingga totono lalono miina nahumempoa.

²¹Panda-pandano Herodias ne'awa dua katolala metaa ne kahameno kafe'ulaino oleo kalente'ano Herodes. Ne oleono Herodes nehabu kahame na'a, kosasawindo kabhala weo kadieno Galilea, neangka'indo tantara bhe kamungkula'i weo liwu nopadada nosali'ida. ²²Weo kahame ana'a kalambeno Herodias nolinda. Herodes bhe mie humatono doasiane sepali'a dowoha lindano maitu. Dadi'anomo nopugaumo Herodes ne kalambe na'a, “O ae nekapoindalomua? Tamesalomo, ama'angkoe!” ²³Herodes nofemata ambano, “O ae maka dua nesalomua ama'angkoe, mahingga naselabunta liwu neowaku ini!”

²⁴Kalambe aitu nokalamo nofeena inano ambano, “Ina, aesalo ae bhahaa?” Notobhoosimo inano ambano “Mesalo fotuno Yohanes Fokadiuno!” ²⁵Kalambe amaitu lasao nosuli nofohato Herodes, ambano “Aesalo fotuno Yohanes Fokadiuno, datumei'e ne tala. Amalaemo dua aitu!”

²⁶Nofetingke kamesalono na'a Herodes nobhela sepali'a lalono, tamaka nokiido natumagaliea, kapa'amo padamo nofemata ne wise-ndo mie bhahi. ²⁷Herodes lasao netudu seemie dhagano kamali

nakumala namala fotuno Yohanes Fokadiuno. Mie aitu nokalamo we katohongku,²⁸ notompe wu'uno Yohanes, maka notei'e ne tala. Pada aitu nowa'anemo kalambeno Herodias. Kalambe aitu lasao nowa'ane inano.²⁹ Dofetingke bhihita ana'a, anaguhu'ino Yohanes domaimo doala maeatino maka dokobuhue.

Yesus nepakande mie dapelima hewu kabhahindo

6:30-44

Mat 14:13-21;

Luk 9:10-17; Yoh 6:1-13

³⁰Rasulu netuduno Yesus dosulimo. Dohato detula-tulaanemo kosasawi'ae nehabundo bhe nefoina'u'aondo. ³¹Ambano Yesus ne anaguhu'ino, “Maimo, dokala domoisaomu we molino'ano, dofe-wule'ao'omu nasebantaha.” Kapugau'ano peda ana'a, mba'inomo dobhahi sepali'a mie maino bhe sumulino, sampe Yesus bhe anaguhu'ino miinamo datolala daomaa'a. ³²Dadi'anomo dokalamo domoisa we molino'ano, dosawi ne bhangka.

³³Gaha'a mie bhahi dowohada dokala bhe dopande'aane dua la'ae kumalano maitu. Dadi'anomo mie mai'aono ne sabhaha liwu maitu, dokalamo bhe dotende, doangka wite, sampe dohato wawo andoa. ³⁴Nosampu nomai'ao ne bhangka, Yesus nowohamo kantawundo mie na'a. Nobhelaandamo lalono mba'inomo andoa ini tapedamo gulumano dhumba pata kodhagano, sampe nobhahi toha nofoina'uda. ³⁵Nepanda kaowu oleo, anaguhu'ino dopugau-mo ne Yesus, ambado, “Ingka nepandamo oleo! Nolino sepali'a ne ini. ³⁶Naetaa tududamo dasumuli mie bhahi inia, dotolala'ao dae'oli nehumaando ne liwu bhaha'i ne komie'ano ne owa ini.” ³⁷Yesus notobhoosimo ambano, “Hintimiu so makandeda!” Ambado toha anaguhu'ino, “Peda ae? Ingka tamadae ponambono mie naalu wula^a tae'oliane roti maka naembali tamakandeda!”

³⁸Pada ana'a Yesus nofeenadamo, “Fee onu gaha'a roti ndumandoo'ano ne hintimiu? Soba ondoe'omu!” Pada do'ondoe, ambado, “Lima onu roti bhe haa ulu kenta.”

³⁹Pada aitu Yesus notudumo mie bhahi daengkoha ne wite, ne kahoku meidho'ano, datumombu-tombu wutondo. ⁴⁰Dadi'anomo mie bhahi maitu dengkohamo dotombu-tombu wutondo, nandoo mo'onono setombu, nandoo dua lima fuluno. ⁴¹Yesus noalamo roti lima onuno bhe kenta haa uluno maitu maka nototohana te lani,

^a 6:37 Sakotu'uno: *haa mo'ono dinar*. Sedinar ponambono mie se'oleo.

nefoampe katumpuno lalo ne Ompu Lahata'ala. Pada ana'a nobhe-bhehamo roti aitu maka nowa'andae anaguhu'ino dadumawu-dawuandae mie bhahi. Pedamo dua ana'a kenta haa uluno maitu. ⁴²Kosasawindo dohumaa ampa dowe'i. ⁴³Pada dohumaa, o roti kabhila'ando dotawunaane, nopono ompulu haa kalangka. ⁴⁴Kabhahindo momaano, o mo'ane kaowu dapelima hewu.

Yesus nekala-kala te wawono oe

6:45-52

Mat 14:22-33; Yoh 6:16-21

⁴⁵Pada aitu Yesus lasao notudu anaguhu'ino dasumawi ne bhangka dama'indulu we sewetano, we liwuno Betsaida. Anoa nandoo notudu kadeki mie bhahi maitu dasumuli. ⁴⁶Nopogaati kaowu bhe andoa, Yesus nofonimo nosambahea te kabhawo. ⁴⁷Nohondo oleo bhangka kasawi'ando anaguhuno nohatomo we wuntano ndalo, tamaka Yesus nomoisa te wite. ⁴⁸Nowohada dokadee-deemo dobhose, mba'inomo desumpu kawea. Hambi-hambi tolu mata kohondo'a, Yesus nokala'ida, nekala-kala te wawono oe, patudhuno tanalumalo. ⁴⁹Dowohae nekala-kala te wawono oe, dokonaemo kahanda sampe dokei mpodea. ⁵⁰Dotikenda sepali'a, kapa'amo kosasawindo sanea mohae. Tamaka Yesus lasao nofohatoda ambano, "Fekatangka lalomiu. O Idi inia, koise mote'iomu!" ⁵¹Pada aitu nosawimo weo bhangka, kawea lasao nolino, sampe kosasawindo tadotonto ka'osano mentendo. ⁵²Kapa'amo mahingga dowohaemo, miina'o dalumosangie ma'anano nehabuno Yesus ne lima onu roti maitu, notosungku fekihindo.

Yesus nefeka'osa mie mosakino we Genesaret

6:53-56

Mat 14:34-36

⁵³Dohato we sewetano, dosedemo we liwuno Genesaret, bhangkando dolabue ne itu. ⁵⁴Dosampu domai'ao ne bhangka, miendo liwu lasao dopande'aane gaha'a Yesus humatono maitu. ⁵⁵Dolilimo bhe dopotendehi weo kadie aitu dopofoha-fohato. Mie mosakino do'oweadamo doowada se Yesus, ampa katifetingke'ano kahato'ano. ⁵⁶Ne amai maka dua kakala'ano, ne kota, ne liwu bhalano bhaha'i ne liwu mohobu, sadhia deowa'iane mie mosaki. Mie mosakino maitu tadofondoledamo we kadeteno daoa maka

desalo dadumingkue, mahingga wiwino dhubano kaowu. Kosasawindo dumingkuno Yesus lasao do'osa.

Pahintano Lahata'ala bhe adhatindo Yahudi

7:1-13

Mat 15:1-9

7 Sepaku miendo Farisi bhe pande-pande Kitabi mai'aono we Yerusalem domai dopo'awa'ao Yesus. ²Gaha'a dowohamo seemie hodua anaguhu'ino tadohumaamo mahingga limando miina naongkilo. Ma'anano miina daewanua p_upeda atorano agamando.

³Kapa'amo miendo Farisi, pedamo dua miendo Yahudi sigao'ano, miina daomaa'a ane miina'o daewanu kadeki p_upeda atorano agamando. Andoa dofintahaki sepali'a adhatindo kamungkula'indo. ⁴Ane dosuli domai'ao we dao, miina'o kadeki naembali dohumaa, simbali padamo dofekanggela wutondo peda atorano agamando. Nobhahi dua adhati sigao'ano nefintahakindo, peda ibahano de'omesi kampoho'u'a, kampomaa'a bhe sabhaha katoka mai'aono ne tambaga.

⁵Dadi'anomo dofeenamo ne Yesus, ambado, “Noafa gaha'a anaguhu'imu miina damangkafi'ao adhatindo kamungkula'intoomu? Ingka tadohumaamo, limando miina naongkilo.”

⁶Yesus notobhoosidamo ambano, “Nokotu'umo pugauno anabii Yesaya nopolao'ao hintimiu ini, mie mehaa'ulano! Kapa'amo nandoo tibuhino weo Kitabino peda aini,

‘Mie andoa ini dosombai kanau kaowu ne wiwindo,
tamaka totono lalondo nokodo'o bhe Idi.

⁷ Miina nako'ulu'aa dosombai kanau,
mba'inomo dofofoina'uao pahintano manusia.’^a

⁸Pahintano Lahata'ala miinamo moheruaneomu, maka tafosibhalaomu adhatindo manusia.”

⁹Ambano toha Yesus, “Ingka kapandemiu, hunsae'omu pahintano Lahata'ala, so namatangka'ao adhatimiu. ¹⁰Kapa'amo nandoo pahintano anabii Musa, ‘Fosibhalae inamu bhe amamu. Mie me'awutino inano bhe amano tabeano damekamatee.’^b ¹¹Tamaka hintimiu fofoina'uomu peda aini, ‘Ane o mie nopugau ne inano bhe amano, “Kanandooku so atumanggo'ao hintimiu nembalimo kapopanga so

^a 7:7 Yes 29:13

^b 7:10 Kel 20:12, 21:17; Ul 5:16

Lahata'ala”,¹² maka mie aitu paemo naoafaa ane pae natumulumi inano bhe amano.’^a ¹³ Ane peda ana'a ingka songkoemoomu bhoasaono Lahata'ala, songkoaneomu adhati nefintahakimiu itu. Nobhahi giu pedando itu nehabumiu.”

O giu fofekaharamuno

7:14-23

Mat 15:10-20

¹⁴ Pada ana'a Yesus nosali'imo toha mie bhahi maka nopugau ambano, “Kosasawimiu, fetingkee'omu pugauku ini bhe hunsae'omu weo totono lalomiu! ¹⁵ O ae maka mesua'ano we lalondo manusia miina nafofekaharamua, tamaka o ae lumimba'ano mai'aono we lalondo manusia, aitu'aemo fofekaharamunoa. ¹⁶ [Ane dokotingala, tabeano dametingke.]”

¹⁷ Nopesua kaowu weo lambu bhe nopogaati bhe mie bhahi, anaguhu'ino dofeena'aomo ma'anano kapalenda sa'ituini. ¹⁸ Yesus notobhoosidamo ambano, “Gaha'a, hintimiu ini miina dua lumosangie'omua? Miina mande'aaneomua gaha'a oti mesua'ano we lalondo manusia miina nafofekaharamua, ¹⁹ mba'inomo miina namesua'a weo totono lalo, tamaka nekansuhu weo handado maka do'ohoe toha we dhamba.” Pugauno Yesus na'a nokoma'ana'ao sabhaha oti nehumaa nembali dohumaa'ea.

²⁰ Ambano toha, “O ae lumimba'ano nomai'ao we lalondo manusia, aitu'aemo fofekaharamunoa. ²¹ Kapa'amo nomai'ao weo totono lalondo manusia nolimba sabhaha fekihi modai peda dopokawite-wite, dosibu, dofopongko, ²² domonsule, kakadau-dau, isikadhi modai, kabhohe-bhohe'i, nafusuu modai, kakoulano lalo, ka'umbu ne Lahata'ala, kalangkeno diu bhe katu'ano fotu. ²³ Kosasawi'ae podiu modai ini nomai'ao we totono lalo, mekaharamunomo manusia.”

Kaparasaeano seemie hobhine mai'aono we koliwuno

7:24-30

Mat 15:21-28

²⁴ Maka nomai'ao ne itu Yesus nohope we kadieno Tirus bhe Sidon. Sahatono nopesuamo ne se'onu lambu mba'inomo nongage hatono maitu damande'aane miendo liwu, gaha'a miina sepali'a

^a 7:11-12 Kapopanga medano aini dokonae *korban* waktuu ana'a. Kanandoodo tadosambilimo putae naembali kawa'ao so kahadhaano Ompu. Dadi'anomo dobebasimo ne takando do'ondofao kamungkulando. Gaha'a dhoi aini miina dama'ane Ompu, tamaka tadopakemo mbali kafaraluuno wutondo.

natifebunia. ²⁵Ne itu nandoo seemie hobhine, anano nopesuakie seetani. Anano ini o hobhine dua. Sanofetingke Yesus nohato, hobhine aitu lasao nokala nosudhu ne wiseno. ²⁶Hobhine ana'a mieno Yunani mai'aono we kadieno Siro-Fenesia, [suano mieno Yahudi]. Anoa nesalo mpuu ne Yesus so namolimba'ao seetani mesuakino anano maitu. ²⁷Yesus tanopugau ambano, “Hunsa'anomo kadeki ana'i so momaano ampa daowe'i, kapa'amo pae namantasia o roti so ana'i damalae maka da'umohoane da'u.”

²⁸Hobhine ana'a notobhoosimo ambano, “Anoamo na'a Waompu, ampamo kaowu o da'u we pandano medha [peda insaodi ini] dohumaa dua kapondawundo ana'i.”

²⁹Ambano toha Yesus ne hobhine aitu, “Bahangka pedamo ana'a pugaumua, sulimo! O seetani nolimbamo mai'ao ne anamu.”

³⁰Hobhine amaitu lasao nosuli se lambuno, nohatofi anano nandoo nendole-ndole ne kaodo'ano. O seetani nolimbamo daanumo.

Yesus nefeka'osa seemie kapongke

7:31-37

³¹Nopalusi ana'a Yesus nohunsamo kadieno Tirus noangka we Sidon nohope we te'ino Galilea. Noangkai dua kadieno Dekapolis.

³²Ne itu deowaanemo seemie kapongke pakade nomahasai nopugau, maka desalo natumei limano te wawono. ³³Yesus noowa kapongke na'a nopogaatiane bhe mie bhahi, maka nofopesua wunano limano ne kohaambali'ae tingalano mie aitu. Pada ana'a nekapehamo maka nofedampa lelano mie aitu. ³⁴Yesus noto-tohanamo te lani, nofeeneimbusu maka nopugau ambano, “*Efata*,” ma'anano, “Tilengka'o toha!”

³⁵Tingalano mie aitu notilengkamo, katapuno lelano notilensemo bhe nelaamo pugauno. ³⁶Yesus no'ele'aanda sepali'a pae daekapunaa ne mie sigao'ano, tamaka dhulu no'ele'aanda, dhulu detulataulaane. ³⁷Mie metingkeno tadomente bhe dotonto. Ambado, “Pahasili, ingka sabhaha giu nofekataa'ie. O kapongke nofofetingkeda, o bhohe nofekapandeda dopugau.”

Yesus nepakande mie dafefato hewu

8:1-10

Mat 15:32-39

8 Miina naomponaa pada ana'a nandoo toha mie bhahi dopofo'fo'onu. Mba'inomo miina dako'otia, Yesus nosali'imo anaguhu'ino maka nopugau ambano, ²“Nobhelaanda sepali'a laloku

mie bhahi ini. Tolu oleomo doangkafi kanau, miinamo dako'otia. ³Ane atumududa dasumuli'ao kulino handado, dakumamposola we sala. Kapa'amo nandoo mai'aono we kodo'ono.”

⁴Dotobhoosimo anaguhu'ino ambado, “Ne kalino'a aini ne amai dae'awa gaha'a roti so daomaa mie kabhahi peda ini?” ⁵Yesus nofeenadamo, “Tafee onu gaha'a roti ndumandoo'ano?” Ambado, “Tafitu onu.”

⁶Pada aitu Yesus notudumo mie bhahi maitu daengkoha ne wite. Noalamo roti fitu onuno na'a, nefoampe katumpuno lalo ne Lahata'ala, maka nobhebhehae. Roti ana'a nowa'andae anaguhu'ino dadumawu-dawuandae mie bhahi, lasao dodawu-dawue. ⁷Nandoo dua kenta mohobu'i seendai. Yesus nefoampe toha katumpuno lalo maka kenta amaitu dodawu-dawuandae dua mie bhahi. ⁸Mie bhahi dohumaa ampa dowe'i. Pada dohumaa, roti kabhila'ando dotawunaane, nopono fitu kalangka. ⁹Kabhahindo momaano dapefato hewu. Pada peda na'a Yesus notududamo dasumuli. ¹⁰Anoa bhe anaguhu'ino lasao dosawi ne bhangka maka dokala we kadie-no Dalmanuta.

Miendo Farisi desalo tanda timente'aono ne Yesus

8:11-13

Mat 16:1-4

¹¹Domaimo miendo Farisi dopuga-pugau bhe Yesus, de'ondofitingku damo'alae. Desalomo naehabuanda giu timente'aono so katandaino putae Anoa ini nomai'ao te surugaa. ¹²Pada noka'uu we lalono, Yesus notobhoosidamo ambano, “Noafa gaha'a mie dhamani aini desalo'ao tanda timente'aono? Amohatokoomu, paise! Pae sepali'a aehabuanda tanda kamesalondo.”

¹³Nopalusi ana'a nohunsadamo, nosawi toha ne bhangka maka nopolimba we sewetano.

Podiundo miendo Farisi bhe kolaki Herodes doposandahaane bhe rahi kaefo'ende'a roti

8:14-21

Mat 16:5-12

¹⁴Anaguhu'ino Yesus dolimpu daewowo'o roti, mpahinomo se'onu we bhangka. ¹⁵Yesus nofodhagadamo ambano, “Posi'ondoomu ne rahi kaefo'ende'a rotindo miendo Farisi bhe ragino kolaki Herodes.” ¹⁶Anaguhu'ino detula-tulamo sapada-pada andoa ambado, “Kapugau'ano peda na'a mba'inomo miina bhe rotintoomua.”

¹⁷Gaha'a Yesus nopande'aane dua nepuga-pugau'aondo maitu, dadi'anomo nofeenadamo ambano, "Noafa gaha'a pugau'ao'omu miina bhe rotia? Miina'o mande'aaneomua gaha'a? Miina'o dua lumosangie'omua? Ingka notosungku sepali'a fekihimiu! ¹⁸Ingka bhe matamiu, noafa gaha'a miina fowoha'ao'omu? Ingka bhe tingalamiu, noafa gaha'a miina fofetingke'ao'omu? Molimpu'aanemoomu gaha'a, ¹⁹aebhebheha lima onu roti mbali dohumaa mie dolima hewu. Fee kalangka gaha'a kabhila'andoa netawunaomiu?" Dotobhoosimo ambado, "Ompulu haa kalangka."

²⁰"Ne oleono aebhebheha fitu onu roti mbali dohumaa mie dofato hewu, fee kalangka gaha'a kabhila'ando netawunaomiu?" Ambado, "Fitu kalangka." ²¹Pada ana'a Yesus nopugaumo toha ambano, "Peda ae? Miina'o dua lumosangie'omu gaha'a?"

Yesus nefeka'osa kabunto we Betsaida

8:22-26

²²Yesus bhe anaguhu'ino dohatomo we Betsaida. Ne itu deowane seemie kabunto maka desalo namedampae. ²³Yesus nointaha limano kabunto maitu maka notonda-tondae, noowae we simbalino liwu. Pada aitu nopuntohimo matano maka notei limano te wawono bhe nofeenae ambano, "Koniwohamo?"

²⁴Mie ana'a no'ondomo te wise maka nopugau ambano, "Uumbe, awohamo mie dekala-kala, tamaka kabeanga'ida pu'uno sau."

²⁵Yesus nofedampa toha matano mie aitu, maka matano notilangka, netaamo kofowohanoa. Sabhaha newohano nentaleamo bhe notindamo. ²⁶Pada ana'a Yesus notuduemo nasumuli se lambuno tamaka nofohatoe ambano, "Koemo sulia se liwu sa'ituini!"

Petrus no'akui putae Yesus o Mesias

8:27-30

Mat 16:13-20; Luk 9:18-21

²⁷Yesus bhe anaguhu'ino dokala we liwu-liwu we kadieno Kaisarea Filipi. We laano sala, Yesus nofeenadamo ambano, "O mie dokona kanau la'ae gaha'a Idi inia?"

²⁸Dotobhoosimo ambado, "Nandoo kumonako Yohanes Fokadiuno, nandoo dua kumonako Elia, siga'a dokonako dua seemie anabii."

²⁹Yesus nofeenadamo dua ambano, "Ane hintimiu, kona kanau'omu la'ae?" Notobhoosimo Petrus, ambano, "Hintu ini Mesias, Omputo Fosalamatino!"

³⁰Tamaka Yesus no'ele'aanda sepali'a daekapuna ne mie si-gao'ano la'ae Anoa maitu.

**Yesus nofofohato'ao kakadee-dee so nenamisino
bhe so kamate'ano**

8:31-38

Mat 16:21-28; Luk 9:22-27

³¹Nopalusi ana'a Yesus notandamo nofohato anaguhu'ino ambano, “Anano Manusia – Idimo ini – tetewei nabhahi naenamisi kakadee-dee. Anoa dabansie kamu-kamungkula'i, neangka'indo imamumu bhe pande-pande Kitabi. Damongkoe, tamaka ne katolu oleono nadumadimo toha.” ³²Yesus nofohatoda mentalea-mentalea, tamaka Petrus nohelae ne sohihino maka nofe'ala. ³³Yesus nodoliki anaguhu'ino maka nofe'ala Petrus ambano, “Gampi seetani! Nefekihimu itu suano nefekihino Lahata'ala, tamaka nefekihino manusia.”

³⁴Pada aitu Yesus nosali'imo mie bhahi bhe anaguhu'ino maka nopugau ambano, “Ane dopoindalo damangkafi kanau, tetewei dahumunsa kapoindalondo wutondo. Mada ana'a datumongku sau salipundo ma'anano do'unda mahingga damate, maka damangkafi kanau. ³⁵Kapa'amo la'ae mongaheno namate, tetewei namate; tamaka la'ae mateno mba'inomo noangkafi Idi bhe Bhihita Metaa, anoamo itu so dumadino. ³⁶O ae fahalaano seemie manusia nae'awa kosasawi'ae kahangkaeano dhunia ini, gaha'a inawano nabinasa? ³⁷Naembali bhahaa o inawa maitu dalumoliane kahangkaea?”

³⁸Ane doambano doangkafi kanau bhaha'i doambano doangkafi kafoina'uku ne olotando mie modai bhe mie kodhosa dhamani aini, Anano Manusia – Idimo ini – naoambanoane dua mie aitu ane namai weo kakalabhiano Amano, dalumibu-libue mala'ekati mongkilono.”

9 Ambano toha, “Amohatokoomu, kotu-kotu'u ne olotamiu ini nandoo so pata'o mateno, ane pae kadeki daoha Kafopahinta'ano Lahata'ala nahumato bhe kuasano.”

Anaguhu'ino dowoha kakalabhiano Yesus te kabhawo

9:2-13

Mat 17:1-13; Luk 9:28-36

²Nopalusi nomo oleo, Yesus noowamo Petrus, Yakobus bhe Yohanes dofoni te kabhawo melangke'ano. Ne itu domoisa kaowu. Gaha'a Yesus notibhaliimo woha'ano ne wisendo. ³Pakeano nopupute sepali'a bhe nokosilo. Pae nandumandooa bhe naseemie te

dhunia ini so mandeno metofano ampa naopute peda amaitu. ⁴Pada aitu tadowohamo dua anabii Elia bhe anabii Musa dopuga-pugau bhe Yesus. ⁵Nopugaumo Petrus ne Yesus ambano, “Guru, ingka netaa domai'omu ne ini. Naetaamo taefongkoha bhantea natolu onu, se'onu so Hintu, se'onu so anabii Musa bhe se'onunoa so anabii Elia.” ⁶Kapugau'ano peda maitu, mba'inomo miina namande'aane bhaha'i napugau'ao ae, ka'osano kate'indo. ⁷Gaha'a nokaolumidamo olu, maka nomai'ao weo olu maitu notifetingkemo suaha ambano, “Aini'aemo anaku nemoasi'aoku. Fetingkee'omu pugauno.” ⁸Setolinda'a, dofolili matando miinamo dakoniwohaa, tamo Yesus nomoisa.

⁹Wakutuuno dosampu mai'ao te kabhawo Yesus nofohatodamo ambano, “Koise mekapunaomu ne mie sigao'ano newohamiu sa'itu-ini. Sembali Anano Manusia – Idimo ini – namanumo namai'ao ne mate maka naembali mekapunaomu ne mie sigao'ano.” ¹⁰Andoa doangkafie pugauno, tamaka tadopofee-feenamo ambado, “O ae bhahaa ma'anano namanu mai'ao ne mate?”

¹¹Pada ana'a dofeenamo ne Yesus ambado, “Noafa gaha'a ambado pande-pande Kitabi, anabii Elia so maino wawo?”^a ¹²Notobhoosimo Yesus, “Umbe daanumo, Elia so maino wawo, namosintuwu'ao sabhaha giu. Ampamo kaowu nada amai Anano Manusia, Idi ini? Ingka weo Kitabino anabii notibuhi nabhahi naenamisi kakadee-dee, pae dakumona'ie mie. ¹³Tamaka amohatokoomu, sakotu'uno Elia padamo nomai, tamaka mie bhahi miina dakumona'ie mie, dohabue ampa kapoindalondo. Nopobutu peda tibuhino weo Kitabino anabii.”^b

Yesus nefeka'osa ana'i nepesuakino seetani

9:14-29

Mat 17:14-21; Luk 9:37-43

¹⁴Yesus bhe anaguhu'ino totoluno maitu dosulimo toha we anaguhu'ino sigao'ano, gaha'a dowohadamo nandoo dolibu-libuda mie bhahi. Nandoo dua pande-pande Kitabi tangasano dopotagatagali bhe andoa. ¹⁵Nelaa dowoha Yesus, mie bhahi na'a domente, lasao dotende dosumpui'e. ¹⁶Yesus nofeenadamo, “O ae gaha'a nepotaga-tagali'aomiu bhe pande-pande Kitabi maitu?”

^a 9:11 Mal 4:5

^b 9:13 Aeati aini nopulao'ao Yohanes Fokadiuno.

¹⁷Notobhoosimo seemie ne olotando mie bhahi maitu ambano, “Guru, aowaangko anaku ini. Miinamo namandea nopugau mba'ino mo nopesuakie seetani. ¹⁸Taenomo nohatoe seetani maitu, lasao notihambitao ne wite; nokida kose'ulu-uluno, wobhano tanokobuha-buhamo, noku'i bhe wangkano. Padamo dua aesalo ne anaguhu'imu damolimbae'ao, tamaka miina damooliea.”

¹⁹Maka Yesus nopugaumo ambano, “Pahasili hintimiu ini, mie pata marasaeano! Tana se'ae gaha'a beano so kaomponano aeate bhe hintimiu? Tana se'ae gaha'a so sabahaku? Owae'omu se ini ana'i itu.” ²⁰Ana'i amaitu doowaemo se Yesus. Sanowoha Yesus, seetani na'a kansuhu nogegohao ana'i maitu sampe notihambitao ne wite. Newalo-walole, nokobuha-buhamo bhe wobhano. ²¹Yesus nofeenamo amano ana'i maitu, “Se'aemo kaomponano nopeda aini?” Notobhoosi amano, “Notanda mpini kahobuno. ²²Nentelamo dua seetani maitu nodhudhulaane weo efi bhaha'i weo oe, patudhuno namobinasae. Tamaka ane moolie, tulumu kainsami, mobhela kainsami lalo.”

²³Notobhoosi Yesus, “Noafa gaha'a pugau'ao, ‘Ane moolie?’ Sumanomo doparasaesa, o ae maka dua tetewei dopoolie!”

²⁴Amano ana'i na'a lasao nokei, “Aparasaea Ompu! Tamaka tulumu kanau weo kakaeno kaparasaekaku ini!”

²⁵Yesus nowohamo mie dodhulu kabhahi dolibuda, maka no'amahaki seetani maitu ambano, “Hintu seetani! Mefobhohe bhe mefopongke mie! Atuduko limba'o toha mai'ao ne ana'i aini, maka koemo suli-sulikiea!”

²⁶Ana'i na'a nogegohaane toha seetani aitu, lasao nolimba bhe nopokakei-kei. Ana'i na'a woha'ano tapedamo mie mate, sampe ambado mie bhahi, “Ingka nomatemo.” ²⁷Tamaka Yesus nointaha limano ana'i na'a maka nofowanue, lasao noehe'ao wutono.

²⁸Dohato kaowu se lambu, Yesus bhe anaguhu'ino tadomoisa, dofeenamo ne Yesus ambado, “Noafa gaha'a ingka insaodi miina tamooliea tafolimba seetani sa'ituinia?”

²⁹Notobhoosi ambano, “Seetani medano sa'ituini miina nati-folimba, simbali dosambahea'ane.”

Yesus nopugau'ao toha so kamate'ano

9:30-32

Mat 17:22-23; Luk 9:43-45

³⁰Domai'ao ne itu Yesus bhe anaguhu'ino dokalamo toha dongka we kadieno Galilea. Anoa nongahe damande'aane kakala'ano,

³¹ mba'inomo nandoo nofoina'u anaguhu'ino. Ambano, “Anano Manusia – Idimo ini – damowae ne limando mie kokuasano, maka damongkoe. Tamaka ne katolu oleono nadumadimo toha.”

³² Anaguhu'ino miina dalumosangiea pugauno, tamaka dote'i dameenae.

La'ae foliuno kabhala?

9:33-37

Mat 18:1-5; Luk 9:46-48

³³ Pada ana'a dohatomo toha we Kapernaum. Dopesua kaowu weo lambu, Yesus nofeenamo ne anaguhu'ino, “Puga-pugau'ao'omu ae gaha'a we sala sa'ituinia?”

³⁴ Tamaka miina dakodiua mba'inomo sa'ituini we sala dopo-tagatagali'ao la'ae foliuno kabhala ne olotando andoa maitu.

³⁵ Nengkoha kaowu, nosali'idamo koompulu hoduando anaguhu'ino, maka nofohatoda ambano, “Dopoiindalo dembali so neangka tabeano dombuhumai, do'ondofao kadeki kafaraluundo mie bhaindo.”

³⁶ Pada ana'a, Yesus netondamo seemie ana'i kahobu, nofoehee ne wisendo maka nokakopue bhe nopugau, ³⁷ “Dotahima kaowu ana'i medando aini weo neaku, dotahimamo Idi. Dotahima Idi, suano kaowu o Idi, tamaka dotahima dua Tumudu kanau.”

La'ae pata foewangino, o sabhangka

9:38-41

Luk 9:49-50

³⁸ Nopugaumo Yohanes ne Yesus, “Guru, tawoha seemie nefolimba seetani nopake neamu, lasao ta'ele'aane hampano suano mie mangkafino intaodiomu ini.”

³⁹ Tamaka Yesus notobhoosi, “Koise ele'aaneomua, hampano pae bhe so mehabuno giu timenteaono namake neaku, lasao dua na'umumbu kanau. ⁴⁰ Ane miina dafoewangi, ingka o sabhangkamo. ⁴¹ Amohatokoomu inia, kotu-kotu'u o mie ma'angkoomu oe kafoho'u mba'inomo hintimiu anaguhu'ino Mesias, Omputo Fosalamatino, tetewei naetaa dawuano.”

Sabhaha giu nekodhosa'ao

9:42-50

Mat 18:6-9; Luk 17:1-2

⁴² “Ane nandoo mie mefekakolilinono totono lalono ana'i kahobu medando ini, sampe miinamo namarasaea ne Idi, selabhi'aku dakumantaiane kagili kontu ne wu'uno maka damotondue we te'i.

⁴³ Ane ibahano limamu naehabuangko dhosa, totoe; naetaa mesua

surugaa nasembali kaowu limamu bhe mesua narakaa kohaambali'ae limamu, weo efi pata tipeonino. ⁴⁴ [Ne watu o ka'ule-ule miina bhe kamatea, efino miina bhe kapeoa.]^a ⁴⁵ Ane ibahano a'emu naehabuangko dhosa, totoe; hampano naetaa mesua surugaa weo kakempamu bhe da'umohoko weo narakaa kohaambali'ae a'emu. ⁴⁶ [Ne watu o ka'ule-ule miina bhe kamatea, efino miina bhe kapeoa.] ⁴⁷ Ane ibahano matamu naehabuangko dhosa, sungkie; hampano naetaa mesua weo Kafopahinta'ano Lahata'ala nasembali matamu bhe da'umohoko weo narakaa kohaambali'ae matamu. ⁴⁸ Ne watu o ka'ule-ule miina bhe kamatea, efino miina bhe kapeoa.

⁴⁹ Kapa'amo seemie-seemie damekangkiloanda kakadee-dee, peda adhono kapopanga so Lahata'ala dofewaniuane gaha. ⁵⁰ O gaha daanumo netaa, tamaka ane nasimotembe'a, kiha-kiha damekakaane dua ae? Dadi'anomo, tabeano membaliomu peda gaha, pometa-metaa'omu.”

Pohunsa'a

10:1-12

Mat 19:1-9; Luk 16:18

10 Nomai'ao ne itu Yesus nokalamo we kadieno Yudea bhe kadie we sewetano umelena Yordan. Mie bhahi domaimo toha dolibue. Peda kaneano, Yesus nofoina'udamo toha.

² Domaimo dua miendo Farisi, patudhundo damo'ala. Dofeenamo ambado, “Weo tubhono agamantoomu, bhahaa naembali o mo'ane nopohunsa bhe mieno lambuno?”

³ Yesus notobhoosidamo ambano, “Nowa'angkoomu pahinta ae gaha'a anabii Musa?”

⁴ Dotobhoosi ambado, “Musa miina nafa'ele'aoa dopohunsa, sumanomo debuhiane bhe suhano.”^b

⁵ Ambano toha Yesus, “Musa nobuhiangkoomu pahinta ana'a hampano katu'ano fotumiu. ⁶ Kapa'amo pakatandano dhunia, Ompu Lahata'ala nefokonandoo manusia, o mo'ane bhe hobhine.^c ⁷ Dadi'anomo o mo'ane tetewei nahumunsa inano bhe amano maka nase'ise bhe hobhineno, ⁸ sampe kohoduando daembalimo seemie. Dadi'anomo

^a 9:44 Ma'anano kanahakaa suhuh dhamani; Yes 66:24

^b 10:4 Ul 24:1-4

^c 10:6 Kej 1:27

andoa maitu paemo dahodua'a tamaka seemie.^a ⁹Nefose'iseno Lahata'ala, koise dopogaatiane manusia.”

¹⁰Sahatondo se lambu, anaguhu'ino dofeena'aomo toha kafo-ina'uno sa'ituini. ¹¹Nofohatodamo ambano, “Ane o mo'ane no-hunsa mieno lambuno maka nogaa toha bhe hobhine sigao'ano, nomonsule'ao mieno lambuno. ¹²Pedamo dua aitu ane o hobhine nohunsa mo'aneno maka nogaa toha bhe mo'ane sigao'ano, no-monsule dua.”

Yesus nebarakati ana'i

10:13-16

Mat 19:13-15; Luk 18:15-17

¹³Nandoo dua mie meowano ana'i kahobu ne Yesus, defekadampada, tamaka anaguhu'ino do'ele'aanda. ¹⁴Sanowohada peda maitu, Yesus no'amahakimo anaguhu'ino bhe nopugau ambano, “Hunsa'anomo ana'i andoa itu damai se Idi! Koise ele'aandaomua, hampano mie medandomo andoa ini so mieno Kafopahinta'ano Lahata'ala. ¹⁵Amohatokoomu, kotu-kotu'u ane pae datumahima Lahata'ala so mahintangino dadindo nameda ana'i kahobu, pae naembalia damesua weo Kafopahinta'ano Lahata'ala.” ¹⁶Pada nopugau peda ana'a, nokakopudamo ana'i maitu maka notei limano te wawondo bhe nobaraktida.

Mie hangkaea no'ali damesua surugaa

10:17-27

Mat 19:16-26; Luk 18:18-27

¹⁷Wakutuuno Yesus noehe nakumala toha, gaha'a nomaimo seemie bhe notende. O mie aitu nofongkoha tuuno ne wiseno Yesus bhe nofeena ambano, “Guru, hintu metaano lalo, aeafa bhahaa so adumadi'ao suhue dhamani?” ¹⁸Notobhoosimo Yesus, ambano, “Noafa gaha'a kona kanau'ao metaano lalo? Ingka miina bhe metaano lalo, mpahinomo wutono Ompu Lahata'ala. ¹⁹Ingka pande'aanemo padaa pahintano Ompu Lahata'ala, ‘Koe fopongko, koe monsule, koe mbolaku, koe membali sakusii kopaha, koe fobhohe-bhohe'i, fosibhala inamu bhe amamu!’”^b

²⁰Ambano toha mie maitu, “Guru, kosasawi'ae pahinta ana'a adhalangiemmo mpini kaana'iku.”

²¹No'ondo mie amaitu, Yesus noasiane maka nopugau ambano, “Tasehonda nekaemimua! Sulimo, asoe sabhaha fehebua'amu,

^a 10:7-8 Kej 2:24

^b 10:19 Kel 20:12-16

olino dawu-dawuandae mie mokae, maka me'awa arataa te surugaa. Mada ana'a maimo angkafi kanau.”²² Nofetingke pugauno Yesus na'a, nobatalamo lalono, lasao nokala. Nosabha handano mba'inomo nohangkaea sepali'a.

²³ Sapalusino aitu, Yesus nofolilimo matano maka nopugau ne anaguhu'ino ambano, “Ka'ali maka mie kokanandoo damesua weo Kafopahinta'ano Lahata'ala.”

²⁴ Anaguhu'ino domente dofetingke pugauno na'a. Tamaka Yesus nopugaumo toha ambano, “Ana'iku, no'ali daanumo damesua Kafopahinta'ano Lahata'ala.”²⁵ Nomuda se'ulu kahumbau^a namangka ne kabhentano deu bhe seemie hangkaea namesua weo Kafopahinta'ano Lahata'ala.”

²⁶ Dofetingke pugauno Yesus maitu sedhulu'a dua kamentendo bhe dokohedu, sampe dopugaumo sapada-pada andoa ambado, “Ane peda na'a, la'ae dua so sumalamatino?”

²⁷ Yesus no'ondodamo bhe nopugau, “Uumbe daanumo, so manusia pae bhe kapoolia nakumadhadhia'a peda amaitu, tamaka so Lahata'ala miina bhe pata nemondoino.”

Ponambo doangkafi Yesus

10:28-31

Mat 19:27-30; Luk 18:28-30

²⁸ Maka ambano Petrus ne Yesus, “Ingka insaodi ini tapadaemo tahunsae bhahi-bhahi'ae maka taangkafiko!”²⁹ Notobhoosimo Yesus, ambano, “Amohatokoomu! Kotu-kotu'u ane dohunsa lambudo, bhahitie'indo, inando, ana'indo bhaha'i kaampondo hampano doangkafi Idi bhe Bhihita Metaa, nandoo so ne'awando.”³⁰ Ne dhamani aini dae'awa mo'ono paku kabhahino: o lambu, o bhahitie, o ina, o ana'i bhe kaampo, tamaka daenamisi dua kafodee-dee. We dhamani mbuhumai dae'awa dadi suhue dhamani.³¹ Kapa'amo dabhahi mie ma'induluno sumuli dambuhumai, mie mbuhumaino sumuli dama'indulu.”

Katolu pakuno Yesus nofohatoanda so kamate'ano

10:32-34

Mat 20:17-19; Luk 18:31-34

³² Yesus bhe anaguhu'ino tangasano we laano sala dahumope we Yerusalem. Yesus nopa'indulu. Anaguhu'ino domihiane lalondo, mie mangkafie dote'iane. Nosali'imo toha anaguhu'ino ompulu

^a 10:25 Sakotu'uno: *se'ulu unta*.

hoduano bhe nofohatoanda so netompaloino. ³³ Ambano, “Fetingke-omu! Aitu dahumopeomu we Yerusalem. Ne watu Anano Manusia – Idimo ini – damowae ne limando neangka'indo imamu bhe pande-pande Kitabi. Andoa dabhotusie damongkoe. Mada ana'a damowae toha ne limando mie pata mande'aono Ompu Lahata'ala. ³⁴ Andoa na'a damele-elee, dakumapehasie, dahumambisiane habuta maka damongkoe. Tamaka ne katolu oleono nadumadimo toha.”

Kamesalondo Yakobus bhe Yohanes

10:35-45

Mat 20:20-28

³⁵ Pada aitu Yakobus bhe Yohanes, ana'ino Zebedeus, doma'otimo Yesus maka dopugau ambado, “Guru, nandoo bhe kamesalo mani. Sio-siomo tumahimae!” ³⁶ Notobhoosimo Yesus ambano, “Amafa'iangkoomu gaha'a gaomiu?” ³⁷ Ambado toha, “Gao mani mpuu nahumato fopahintangi weo kakalabhiamu, insaodi ini taengkohe ne sohilimu; seemie ne suanamu, seemie ne kemamu.”

³⁸ Tamaka notobhoosida Yesus ambano “Ingka miina mande'aneomua ma'anano kamesalomi na'a. Mondoi'eomu moho'uomu ne kampoho'u'a so kafoho'u'aku, tawa dakumadiuangkoomu oe kakadiuku?”^a

³⁹ “Tamondoi'e,” ambado. Yesus nopugaumo toha ne andoa, ambano, “Uumbe daanumo, moho'uomu ne kampoho'u'aku bhe dakumadiangkoomu oe kakadiuku. ⁴⁰ Ampamo kaowu daengkohe ne suanaku bhaha'i ne kemaku, suano Idi so motantue. Kaengkohe ana'a pada dofontaa-ntaa'andae so mie nepilino Ompu Lahata'ala.”

⁴¹ Dofetingke peda na'a, anaguhu'i sigao'ano do'amahamo ne Yakobus bhe Yohanes. ⁴² Tamaka Yesus nosali'idamo maka nofohatoda ambano, “Ingka pande'aneomumu, mahintangino sabhaha liwu pata mande'aono Ompu Lahata'ala dofodee-dee ra'eatindo, neangkando nokii sepali'a dofodhala pahintando. ⁴³ Nopo'ala bhe hintimiu. So moindalono membalino kabhala, tabeano na'umondofao kadeki kafaraluundo mie bhaino. ⁴⁴ So moindalono membalino mie neangka, tabeano naembali palima-limando sigao'ano. ⁴⁵ Kapa'amo wutono Anano Manusia – Idimo ini – nomai pae naefe'ondofao, tamaka nafa'ondofao bhe nafowa'ao inawano so katolosindo mie bhahi.”

^a 10:38 Ma'anano: mondoi'eomu menamisiomu sabhaha kakadee-dee nameda so nenamisiku?

Yesus nofeka'osa Bartimeus

10:46-52

Mat 20:29-34; Luk 18:35-43

⁴⁶Yesus bhe anaguhu'ino dohatomo we Yeriko. Dalumimbaki kaowu Yeriko, dobhahi mie mangkafie, gaha'a nandoo seemie kabunto nengkoha-ngkoha ne wiwino sala nesalo-salo. Neano Bartimeus, anano Timeus. ⁴⁷Sanofetingke lumalono maitu Yesus miendo Nasaret, nokeimo kabunto na'a ambano “Yesus, sampu'ano Daud, mobhela kanau lalo!” ⁴⁸Dobhahi umamahakie so pae nakodiu'ao, tamaka tanodhulu kahaa'i nokei, “Sampu'ano Daud, mobhela kanau lalo!”

⁴⁹Yesus nofetumpumo maka nopugau ambano, “Lo'oi'eomu!” Lasao dosali'i kabunto maitu bhe dofohatoe, “Fekatangka lalomu! Ehemu, nosali'iko!” ⁵⁰Tanolembi dhubano, nosiehe'a, lasao nokala nopo'awa'ao Yesus. ⁵¹Yesus nofeenaemo, “Amafaangko gaha'a gaomu?” Notobhoosimo, “Guru, gaoku afowoha.” ⁵²“Kalamo,” ambano Yesus, “Hampano kaparasaeamu ne Inodi, mo'osamo!” Wakutuu ana'a lasao nofowoha, maka noangkafi Yesus.

Yesus nopesua we Yerusalem, dobhidha-bhidhae peda seemie omputo

11:1-11

*Mat 21:1-9;
Luk 19:28-38; Yoh 12:12-15*

11 Yesus bhe anaguhu'ino doma'otimo Yerusalem. We owano Betfage bhe Betania, liwu ne laano kabhawono Zaitun, Yesus netudumo dohodua anaguhuno dama'indulu. ²Nofohatoda ambano, “Kalaomu we liwu te wise watu! Samesua'omu, mohao-mu se'ulu anano keledai dotapue, miina'o sepali'a natisawikia. Lensee'omu maka tondae'omu se ini. ³Ane bhe so meenano, ‘Noafa lenseaneomu?’ fohatodaomu putae, ‘Nofaraluu'e Ompu, ingka pae naomponaa damosuliemo toha.’ ”

⁴Pada aitu dokalamo maka dowoha se'ulu anano keledai, dotapue te wiseno lambu, ne wiwino kaangka'a. Lasao dolensee. ⁵Mie meehe-eheno ne itu dofeenamo, “Noafa gaha'a lenseaneomu keledai itua?”

⁶Dotobhoosi peda pugauno Yesus sa'ituini, maka do'unda'aandamo dokala. ⁷Keledai aitu dotondae se Yesus, towuno dolempesiane pakeando mbali kaengkoha'ano, maka nosawikie. ⁸Dobhahi tumalesaono pakeando ne kaangka'a. Nandoo dua metalesaono ha'ano

sau bhe hoo-hoono nealando we kaampo. ⁹Mie ma'induluno bhe mangkano kundono kosasawindo debhidha-bhidha ambado,

“Hosana, pudhi Ompu!

Notibarakati maino weo neano Ompu!^a

¹⁰Notibarakati Kafopahinta'ano awuantoomu Daud humatono ini!

Hosana, pudhi kaitaomu Lahata'ala te wawono wawo!”

¹¹Sahatono we Yerusalem, Yesus nopesuamo weo lambuno Lahata'ala. Ne itu nofolili matano, tamaka mba'inomo nohondomo oleo, Anoa bhe anaguhu'ino ompulu hoduno dosuli we Betania.

Yesus nebhatata'iao pu'uno ara

11:12-14

Mat 21:18-19

¹²Hato nomentae, tangasano dokala domai'ao we Betania, Yesus no'ahomo. ¹³Nandoo se kodo'ono nowohamo sep'u'ara nokohoomo. Nokalamo nofe'ondoe bhaha'i kaowu bhe bhakeno. Gaha'amiina nakoniwohaa, ta'o hoo, mba'inomo suano wulano kako-bhake'ano. ¹⁴Yesus nobhatata'iao sau aitu ambano, “Notanda aitu ampa suhue dhamani, bhe naseemie paemo bhe so momaano bhakemu!” Pugauno na'a dofetingkee dua anaguhu'ino.

Yesus negihasi podaoano weo lambuno Lahata'ala

11:15-19

*Mat 21:12-13;
Luk 19:45-48; Yoh 2:13-16*

¹⁵Pada aitu Yesus bhe anaguhu'ino dohatomo toha we Yerusalem. Nopesua kaowu weo kadeteno Lambuno Lahata'ala, Yesus negihasio podaoano ne itu. Medhando mebhase-bhaseno dhoi bhe bhangko-bhangko kapahaaso'ando dhaadhaha nobhansualeda. ¹⁶Miina na'umunda'aandaa daeowa pahaaso weo kadeteno lambuno Lahata'ala maitu. ¹⁷Pada aitu nofoina'udamo ambano, “Notibuhi weo Kitabino anabii, ‘Lambuku dakumonae lambu kasambahea'ando sabhaha liwu. Tamaka hintimiu habue'omu mbali lia ka'onu'ando mie modai!’”^b

¹⁸Neangka'indo imamtu bhe pande-pande Kitabi dofetingke dua kadhadhia amaitu, maka de'ondofi akala damongkoe. Andoa do'te'ie, mba'inomo mie bhahi domenteane kafoina'uno.

^a 11:9 Mzm 118:25-26

^b 11:17 Yes 56:7; Yer 7:11

¹⁹Nohondo kaowu oleo Yesus bhe anaguhu'ino dohunsamo toha kota.

Yesus nofofoina'u'ao kaparasaea bhe sambahea

11:20-26

Mat 21:20-22

²⁰Samentaeno Yesus bhe anaguhu'ino dolalo toha ne owano pu'uno ara endewi. Gaha'a dowohae nomatemo, nokekele bhe paha-pahakano. ²¹Petrus nofe'ulaimo kadhadhia endewi, sampe nopugau ne Yesus, “Guru, soba ondo, pu'uno ara nebhatata'iaomu maitu nomatemo!”

²²Notobhoosimo Yesus ambano, “Parasaea'omu ne Lahata'ala. ²³Amohatokoomu, kotu-kotu'u ane dopugau ne kabhawo aini, ‘Sangke wutomu maka oho wutomu we te'i’, tetewei nakumadhadhia, sumanomo koe nopoibhaha lalondo, tamaka doparasaea pugaundo maitu nako'ula. ²⁴Dadi'anomo, amohatokoomu, o ae maka dua kamesalo weo sambaheamu, taparasaeamo umawae, maka tetewei umawae. ²⁵Tamaka taenomo sumambahea, ane nokohobu-hobu totono lalomu ne mie bhaimu, ma'afuane kadeki, neanomo Amamu te surugaa na'umamponiko dua. ²⁶[Ane pae foma'afu'ao, Amamu te surugaa pae dua na'umamponiea dhosadhosamu.]”

Dofeena'ao kuasano Yesus

11:27-33

Mat 21:23-27; Luk 20:1-8

²⁷Yesus bhe anaguhu'ino dohatomo toha we Yerusalem. Tangasano Yesus nekala-kala ne kadeteno Lambuno Lahata'ala, gaha'a domai'iemu neangka'indo imamu, pande-pande Kitabi bhe kamungkula'i. ²⁸Andoa ini dofeenaemo ambado, “O ae gaha'a kaengkohano kuasamu kaehabu'amu sabhaha giu maitu? Nowa'angko la'ae gaha'a kapooli sampe mehabu bhahi-bhahi'ae maitu?”

²⁹Notobhoosidamo ambano, “O Idi ameena dua. Tobhoosi kanau'omu, maka amohatoangkoe'omu kuasa medando ae nepakeku aehabu giu andoa maitu. ³⁰Kuasano Yohanes nofokadiu, nomai'ao ne Lahata'ala kaa nomai'ao ne manusia? Tobhoosi kanau'omu!”

³¹Pada aitu dopuga-pugaumo sapada-pada andoa ambado, “Ane damugau'omu, ‘Nomai'ao ne Lahata'ala’, tetewei namugau, ‘Noafa miina marasaea'aneomu?’ ³²Tamaka koasi dua damugau'omu, ‘Nomai'ao ne manusia.’ ” Andoa dote'i mie bhahi hampano kosasawindo mie dokona Yohanes seemie anabii. ³³Dadi'anomo tadotobhoosimo,


“Miina tamande'aanea.” Ambano dua Yesus, “Ane peda na'a, pae amohatokoomu dua, kuasa medando ae nepakeku ahabu giu andoa maitu.”

Kapalendano kumahadhaano ne kaampono angguru

12:1-12

Mat 21:33-46; Luk 20:9-19

12 Nopalusi peda na'a Yesus nopugaumo ne meangka'indo imamu, pande-pande Kitabi bhe kamungkula'i, nepakeanda kapalenda. Ambano, “Nandoo seemie nelengka kaampo maka nekantisaane angguru. Kofatowala'ae kaampono nopagalae. Nseli dua kantobha mbali kaefeo'ano angguru bhe nefoehe kapala so kaedhagani'a. Palusi aitu nefogadhimo mie so kumahadhaano kaampono maitu maka nokala we koliwuno.² Nohato wulano defo'onu hasili, netudumo seemie bhatuano nakumala se kumahadhaano na'a, namala'ao dawuno. ³Gaha'a sahatono katudu amaitu, do-intahaemo maka dohambisie. Pada dohambisie, dotuduemo nasumuli haa mbali limano, miina nakoniwowo'o. ⁴Pada aitu kokaampono netudumo toha mieno sigao'ano. Gaha'a katudu aitu



Kaampono angguru

dohambisie dua sampe nobhela bhe fotuno pakade dofekaamba-noe. ⁵Kokaampono netudumo toha mieno sigao'ano, tamaka katudu aitu dopongkoe. Nobhahi dua mieno sigao'ano netuduno, tamaka siga'a dohambisida, siga'a dopongkoda.

⁶Pada aitu tamo seemie ndumandoono, anano kamoasi'aono sepali'a. Panda-pandano notudumo anano maitu, weo fekihino, 'Anaku ini tetewei daengatie.' ⁷Tamaka dowoha anano maitu, mie kumahadhaano dopugau-gaumo ambado, 'Aini'aemo so kohaku'ao-no kaampono amano. Dopongkoe'anaomu! Hakuno somo intaodi-omu.' ⁸Dadi'anomo lasao dohakoe maka dopongkoe. Maeatino do'ohoe we kundo ala.

⁹Ia naeafamo dua kokaampono maitu? Ingka teteweimo naku-mala'ida kumahadhaano na'a, namongkoda kosasawindo, maka kaampono maitu nama'andae dakumahadhaa'e mie sigao'ano. ¹⁰Molimpu'aanemoomu gaha'a tibuhino weo Kitabino anabii peda aini,

'Kontu ne'ohondo mefelambuno,
gaha'a nembalimo sandi bhalano.

¹¹Kapeda'ano na'a hampano kuasano Ompu,
woha'ano giu timenteaono.' ^a

¹²Nopalusi aitu kamungkula'indo Yahudi maitu de'ondofimo akala dahumako Yesus, hampano dopande'aane kapalenda sa'itui-ni nokantibha andoa. Tamaka mba'inomo dote'i mie bhahi, miina damafa-afaane, tadokalamo.

Tandua'ano sewa so Omputo Kaisar

12:13-17

Mat 22:15-22; Luk 20:20-26

¹³Pada aitu kamungkula'indo Yahudi detudumo seemie hodua miendo Farisi bhe mieno kolaki Herodes dapo'awa'ao Yesus. Patudhundo dametando alano wambano. ¹⁴Sapo'awando bhe Yesus dofeenamo ambado, "Guru, tapande'aane nelaa lalomu. Miina koniengatia, hampano miina po'ala-alaanda manusia, mpahinomo weo kalaano lalomu fofoina'u'ao kaangka'a metaano Lahata'ala so manusia. Weo tubhono agamantoomu naembali bhahaa datu-mandua'o sewa ne Omputo Kaisar kaa paise? Nofaraluu tasumewa kaa paise?"

¹⁵Tamaka Yesus nopande'aane dofehaa'ula, maka nopugau ambano, "Noafa gaha'a soba kanau'omu? Wa'a kanau'omu dhoi pera itu

^a 12:10-11 Mzm 118:22-23

nasewoka ame'ondoe.”¹⁶ Dowa'anemo dhoi pera sewoka. Yesus nofeenadamo ambano, “Gambara bhe kabuhi la'ae gaha'a inia?” Dotobhoosi ambado, “Gambara bhe kabuhino Omputo Kaisar.”¹⁷ Ambano toha Yesus, “Bahangka peda na'a, fehebu'ano Omputo Kaisar wa'aneomu Omputo Kaisar; fehebu'ano Lahata'ala wa'aneomu Lahata'ala!” Dofetingke peda na'a tadomente.

Miendo Saduki dofeena'ao kawanu'ando mie mate

12:18-27

Mat 22:23-33; Luk 20:27-40

¹⁸Nandoo dua miendo Saduki domai ne Yesus. Andoa ini miina damarasaea mie mate dasumuli damanu. ¹⁹Dofeenamo ambado, “Guru, anabii Musa nebuhi pahinta so intaodiomu peda ini, ‘Ane o mo'ane nomate tamaka hobhineno miina nakoana, maka kakuta'ano mo'ane tetewei nagumaa bhe bhihinandano na'a neanomo anano dakumonae sampu'ano mateno maitu.’”^a ²⁰Gaha'a nandoo dopipitu dosibhahi-bhahitie sanea mo'ane. Titiisando nogaa, tamaka nomate miina'o nakoanaa. ²¹Dadi'anomo katuluno nogaamo bhe bhihinandano, tamaka miina'o nakoana nomatemo dua. Pedamo dua aitu aino tulu'ano. ²²Pedamo aitu kansuhu, sampe kopipitundo domate, miina dakoanaa bhe hobhine ana'a. Panda-pandano nomatemo dua hobhine na'a. ²³Nahumato oleo kawanu'ando mie mate, so mieno lambu la'ae hobhine amaitua? Ingka kopipitundo sanea gumaa'ane?”

²⁴Yesus notobhoosida ambano, “No'alamo sepali'a fekihimiitu. Kapa'amo miina mande'aaneomu tibunino weo Kitabino anabii, miina dua mande'aaneomu kuasano Lahata'ala. ²⁵Nahumato damanu mie mate, dadumadi nada mala'ekati te surugaa: paemo dagumaa, paemo dua damogaada. ²⁶Ane kawanu'ando mie mate, ingka notibuhi weo Kitabino anabii Musa; miina'o basae'omua gaha'a? Ne itu notibuhi Lahata'ala nopugau ne Musa nomai'ao ne sau kokihi humende'ano. Ambano, ‘Idimo ini Lahata'alano Abraham, Lahata'alano Ishak bhe Lahata'alano Yakub.’”^b ²⁷Ma'anano Ompu Lahata'ala suano Lahata'alando mie mate, tamaka Lahata'alando mie dumadi. Dadi'anomo kotu-kotu'u no'alatimo sepali'a fekihimiitu!”

^a 12:19 Ul 25:5

^b 12:26 Kel 3:6. Ma'anano bhoasaono Lahata'ala ini: mahinggamo Abraham, Ishak bhe Yakub nomponamo domate, sadaa-daa dodadi te wiseno Lahata'ala.

Pahinta fofoliuno kabhala

12:28-34

Mat 22:34-40; Luk 10:25-28

²⁸Nohatomo dua seemie pande Kitabi, nofetingke Yesus nopuga-pugau bhe miendo Saduki. Anoa nopande'aane katobhoosino Yesus maitu nokantibha maka nofeenamo dua, “Kosasawi'ae pahinta ndumandoo'ano, pahinta medando ae gaha'a foliuno kabhalaa?”

²⁹Ambano Yesus, “Pahinta foliuno kabhala peda aini, ‘Miendo Israel! Fetingkeomu! Ompu Lahata'alantoomu, Ompu Kaseemie-mie'ano. ³⁰Moasiane Ompu Lahata'alamu sampuu-mpuuno lalomu, sampuu-mpuuno alusumu, sampuu-mpuuno fekihimu bhe sampuu-mpuuno ka'osamu.’^a ³¹Pahinta katuluno peda aini, ‘Moasianda mie bhaimu peda kaasimu ne wutomu.’^b Miinamo bhe pahinta moliuno pahinta aini.”

³²Ambano toha pande Kitabi maitu, “Anoamo na'a, Guru. Nokotu'u Ompu Lahata'ala maitu Kaseemie-mie'ano, miina bhe sigao'ano. ³³Nokotu'u dua, daoasiane sampuu-mpuuno lalo, sampuu-mpuuno fekihi bhe sampuu-mpuuno ka'osa, pakade daoasianda mie bhainto peda kaasi ne wutonto. Naetaa damangkafi pahinta aini bhe daeowa sabhaha kapopanga nekantunu bhaha'i nesumbele so Lahata'ala.”

³⁴Nofetingke katobhoosino mie amaitu nopono'ao timbangi, Yesus nopugaumo ambano, “Hintu ini miinamo mokodo'oa bhe Kafopahinta'ano Lahata'ala!” Pada aitu miinamo bhe mokadono so meenaea.

Pokai'ano Yesus bhe Daud

12:35-37

Mat 22:41-46; Luk 20:41-44

³⁵Sepaku tangasano nofofoina'u weo Lambuno Lahata'ala, Yesus nofeenamo ambano, “Noafa gaha'a pande-pande Kitabi dokona'ao Mesias sampu'ano Daud? ³⁶Gaha'a itu wutono Daud weo kuasano Rohino Lahata'ala padamo nopugau peda aini,

‘Ompu Lahata'ala nokowambamo ne Ompuku,
Mengkohamo ne suanaku ini
ampa kosasawindo kaewamu ahumabuda so
kafinda'amu.’^c

^a 12:29-30 Ul 6:4-5

^b 12:31 Im 19:18

^c 12:36 Mzm 110:1

³⁷Dadi'anomo, ane wutono Daud nokona Mesias maitu Ompuno, maka ma'anano suano kaowu ta'o sampu'ano, tamaka Ompuno dua." Mie bhahi doasiane sepali'a dofetingke kafoina'uno Yesus.

Yesus nofodhagaanda kafoina'undo pande-pande Kitabi

12:38-40

Mat 23:5-7; Luk 20:45-47

³⁸Weo kafoina'uno, Yesus nofohatodamo dua ambano, "Kodha-kodhagaomu ne pande-pande Kitabi. Andoa maitu doasiane de-kala-kala depake dhuba kawanta, doasiane dua dosombaida weo dao. ³⁹Weo lambu kasambahea'a bhaha'i weo kahame andoa sadhia dua dengkoha te wise. ⁴⁰Andoa debhohe-bhohe'i bhihinanda maka dorampasi lambudo. Pakade keana notipande'ao kadaino isikadhindo, tadofekawanta-wantamo sambaheando. Dadi'ano mo nasedhulu'a dua kabhieno kahukumu so ne'awamiu."

Sadhakaano seemie bhihinanda mokaeno

12:41-44

Luk 21:1-4

⁴¹Sepaku Yesus nengkoha-ngkoha weo Lambuno Lahata'ala, nopowise bhe sohongano sadhaka. Anoa nofoti-fotindamo mie bhahi mepopesuano dhoi sadhaka weo sohonga maitu. Dobhahi hangkaea nobhahi'i defopesua dhoi. ⁴²Gaha'a nomaimo dua seemie bhihinanda mokaeno, nepopesua haa kepe, o bhaseno sedhoi. ⁴³Yesus nolo'oimo anaguhu'ino maka nofohatoda ambano, "Amohatokoomu inia! Kotu-kotu'u nobhahi kafopesua'ano bhihinanda mokaeno ini bhe kosasawi'ae kafopesuando mie sigao'ano. ⁴⁴Kapa'amo mie bhahi maitu dosadhaka'ao labhino kanandodo, tamaka bhihinanda aini weo kakaeno nofowa'ao kosasawi'ae so kadadi'ano."

Yesus nokowamba'ao so kahansuru'ano Lambuno Lahata'ala

13:1-2

Mat 24:1-2; Luk 21:5-6

13 Yesus nolimbamo nomai'ao weo Lambuno Lahata'ala. Gaha'a seemie anaguhuno nopugaumo ambano, "Guru, soba ondo! Kabhala'ino bhe katangka'ino kontu aini! Kakesa maka Lambuno Lahata'ala ini!" ²Tamaka Yesus notobhoosie ambano, "Ingka wohae padaa kabhala'ino bhe katangka'ino lambu aini? Bhe nasepoi kontu pae bhe so tumapi'ano te wawono kontu bhaino, kosasawi'ae damadae damohansurue!"

Kasabha bhe kafodee-dee

13:3-13

Mat 24:3-14; Luk 21:7-19

³Yesus nokalamo te kabhawono Zaitun. Ne itu nengkohamo nofewise we Lambuno Lahata'ala, dopobhaiane Petrus, Yakobus, Yohanes bhe Andreas. Andoa ini dofeenaemo ambado, ⁴“Fohato kainsami, naefie gaha'a kosasawi'ae na'a nakumadhadhia? Maka o ae so katandainoa, ane nahumatomo tempono?”

⁵Yesus nofohatodamo ambano, “Kodhagaomu bhahaa dofolilino totono lalomiu! ⁶Kapa'amo mada kaowu dabhahi so maino damake neaku bhe damugau ambado, ‘Idimo ini Mesias’, maka dabhahi sepali'a so tibhohe-bhohe'ino. ⁷Ane metingkeomu popahisa'a bhaha'i me'awaomu bhihitano popahisa'a, koemo notikendaa handamiua. Ingka kosasawi'ae maitu tetewei nakumadhadhia, tamaka suano'o dua kafetompaino dhamani. ⁸Liwu dapowangi bhe liwu, kafopahinta'a dapowangi bhe kafopahinta'a. Ne'amai-ne'amai nandumandoo luali bhe gaba. Kosasawi'ae maitu kane'omo kafetompuna'ino dhamani bu'ou, nopototo bhe kaleano so koanano.

⁹Tamaka hintimiu ini posi'ondoomu! Mada kaowu dahumakofikoomu maka dabhitahakikoomu Sahano Agama. Damepekikoomu weo lambu kasambahea'a. Pakade damowakoomu ne wisendo kafeompu'a bhe omputo, hampano membaliomu anaguhu'iku. Aini se'ise dua katolala membaliomu sakusiiku ne wisendo. ¹⁰Ampamo kaowu Bhihita Metaa tetewei damoleleandae kadeki sabhaha liwu we dhunia ini. ¹¹Ane dahumakokoomu maka damowakoomu ne fobhitahakino, koe nekenda-kenda handamiua bhaha'i mugau'omu ae! Tapugaumoomu ampa kafohato'aomiu wakutuu ana'a; hampano suano hintimiu so mugauno, tamaka Rohino Lahata'ala. ¹²O mie damowa kakuta'ando ne kokuasano damongkoe'ao, pedamo dua o ama damowa anando damongkoe'ao. O ana'i damewangi kamungkulando sampe damongkoda. ¹³Hintimiu ini dabansikoomu sabhaha mie hampano neaku. Tamaka ane dakosabaha dapotaami ampa namalusi, dasumalamati.”

Fofekabinasano Timohakuno

13:14-23

Mat 24:15-28; Luk 21:20-24

¹⁴“Weo kasabha maitu mohaomu Fofekabinasano Timohakuno naeehe-ehe ne pata mantasi'ano. (Hintimiu mebasano tabeano

motindae'omu ma'anano!)^a Maka miendo Yudea tabeano damilei te kokabhawo'ano so dasumalamati'ao. ¹⁵Mie we tambi koemo dopesua dakoniala weo lambu.^b ¹⁶O mie te kaampo koemo dosuliki pakeando we liwu. ¹⁷Kadaino maka kolaundo hobhine fowoowano tawa fofotitino wakutuu ana'a. ¹⁸Sambahea'aneomu kosasawi'ae maitu koise nokadhadhia weo wulano use. ¹⁹Wakutuu ana'a nandumandoo kasabha foliuno kabhibhiisa. Kasabha pedando na'a miina'o nakumadhadhia, notanda Ompu Lahata'ala nofonandoo dhunia inia, ampa ha'oleo ini, pakade paemo dua namendua nakumadhadhia. ²⁰Ane ibahano Ompu pae nakumuhangi tempono, kotika dumadino pae bhe so sumalamatino. Tamaka mba'inomoo nandoo umati tipilino, Ompu Lahata'ala nakumuhangi tempono.

²¹Wakutuu ana'a, ane bhe so mugauangko ambado, 'Ondoe, aini'aemo Mesias, Ompu Fosalamatino' tawa, 'Ondoe, atatu'ae Mesias', koe parasaea'omua. ²²Kapa'amo dabhahimo mabhino wutono Mesias, gaha'aitu suano. Dabhahi dua mpahaana-anabiino. Andoa na'a daehabu tanda-tanda tapa mentela bhe giu timente'aono, patudhundo ane naembali damokolilino dua totono lalondo umati tipilino. ²³Dadi'anomo hintimiu kodhagaomu! Kosasawi'ae padamo afohatoangkoe'omu wawo inia."

Kahato'ano Anano Manusia

13:24-27

Mat 24:29-31; Luk 21:25-28

²⁴"Wakutuu ana'a, namalusi sabhaha kasabha na'a, o oleo nahohondomo, o wula paemo nakotilangaa. ²⁵O kulipopo dapondawuti damai'ao te lani bhe kosasawi'ae waweno alamu naohungga. ²⁶Wakutuu ana'a Anano Manusia – Idimo ini – damohae namai te olu, natiwoha weo kakalabhiano bhe kuasa bhalano. ²⁷Natumudu mala'ekatino damo'onu umatino tipilino, damai'ao ne kofatowala'ae alamu, damai'ao te bhete'ano oleo ampa we soo'ano."

Dopoguhu ne pu'uno woha'a

13:28-32

Mat 24:32-35; Luk 21:29-33

²⁸"Soba poguhumu ne pu'uno woha'a!^c Ane notawomo ha'ano, pande'aanemoomu noma'omo nako'oleo. ²⁹Pedamo dua aitu,

^a 13:14 Dan 9:27, 11:31, 12:11

^b 13:15 Sakotu'uno: *ndumandoono te ato potate'ano*, koemo dosampu damesua dakoniala weo lambu.

^c 13:28 Sakotu'uno: *pu'uno ara*.

mohaomu kaowu kadhadhia nepulao'aoku sa'ituini, mande'aane-moomu noma'omo sepali'a tempono, ingka te wisenomo fointo. ³⁰Amohatokoomu! Kotu-kotu'u mie dhamani aini pae'o daopulia damate, nakumadhadhiamo kosasawi'ae na'a. ³¹O lani bhe dhunia naosali, tamaka wambaku ini pae bhe kasalia. ³²Ampamo kaowu oleono bhe tempono bhe seemie miina bhe mande'aanea. O mala'ekati te surugaa miina, Anano Manusia miina dua, mpahinomo wutono Amaku mande'aanea.”

Kafodhaga

13:33-37

Mat 24:36-44

³³“Dadi'anomo posi'ondoomu! Kodhagaomu, kapa'amo miina mande'aaneomu naefie nahumato tempono. ³⁴Naembali doposandahaane bhe seemie kumalano we koliwuno. Lambuno noposahuna'aane mie'ino. Seemie-seemie bhe takano, dhagano fointo nofohatoe naekamboto, nakodhaga sepali'a. ³⁵Dadi'anomo kodhagaomu, hampano miina natipande'aoa so kahato'ano kolambuno. Bheanea nahumato sanimohondo, bheanea kafewunta'ino alo, bheanea nabhala nekundono alo tawamo sanimentaeno. ³⁶Ane nasehato'a kolambuno, kodhagaomu bhahaa nohafotikoomu tangasano moodoomu. ³⁷Wambaku ne hintimiu ini, amohatoandae dua kosasawindo manusia: mantaa-ntaa'omu bhe kodha-kodhagaomu!”

Dopokanagau so damongko'ao Yesus

14:1-2

Mat 26:1-15;

Luk 22:1-2; Yoh 11:45-53

14 Hohaea'ano Paska bhe hohaea'ano Roti Pata Koragi'ano tana haa oleo. Neangka'indo imamumu bhe pande-pande Kitabi dopokanagau de'ondofi akala dahumako Yesus. Tamaka patudhundo pae damande'aane mie bhahia, maka damongkoe. ²Dadi'anomo ambado, “Koise dohakoe'omu ne oleono hohaea'a, bhahaa dohialele ra'eati.”

Yesus nominakie seemie hobhine

14:3-9

Mat 26:6-13; Yoh 12:1-8

³Wakutuu ana'a Yesus tangasano nohumaa we lambuno Simon kokuli modaino [endefi'ini,] we liwuno Betania. Gaha'a tanosihato'amo seemie hobhine. Hobhine ana'a newowo'o seewua butolo

kani^a nopono'ao mina-mina mowondu'ano sepali'a pakade no'ali, dokonae minano warasituu. Wu'uno butolo na'a nokebhae, maka mina-minano nosungkae te fotuno Yesus. ⁴Mie mohae nandoo umamahano, maka dopugau sapada-pada andoa ambado, “So ae gaha'a dopokadai-daianea mina-mina amaitu? ⁵Ane damasoe, ingka nakolabhi tolu mo'ono woka pera, maka olino na'a naembali dadumawu-dawuandae mie mokae.” Dadi'anomo do'amahakimo hobhine ana'a.

⁶Tamaka Yesus nopugaumo ambano, “Hunsa'anomo! Noafa gaha'a fekasabhaaneomu? Anoa ini nehabu kanau giu metaa'ano. ⁷Ingka o mie mokae sadhia deate bhe hintimiu, ane moindaloomu sadhia naembali tumulumidaomua. Tamaka Idi ini pae aeate kansuhua bhe hintimiu. ⁸Hobhine aini nehabumo ampa nepoo-poolino. Mbadhaku ini nominakiemo wawo, somo katokano humato dakumobuhu kanau. ⁹Amohatokoomu! Kotu-kotu'u ne amai maka dua so katifolele'ano Bhihita Metaa te dhunia ini, nehabuno hobhine aini sadhia daetula-tulaane dua, somo kafe'ulaino.”

Isikadhi modaino Yudas

14:10-11

Mat 26:14-16; Luk 22:3-6

¹⁰Pada aitu Yudas Iskariot nokalamo nopo'awa'ao neangka'indo imamu, patudhuno namowaanda Yesus. Yudas ini seemie mai'ao ne anaguhuno ompulu hoduanu. ¹¹Ka'iando maka neangka'indo imamu dofetingke peda na'a, lasao dopodhandi dama'ane dhoi. Notanda ne na'a, Yudas ne'ondofi katolala metaa namowaanda Yesus.

Haroano Paska

14:12-21

*Mat 26:17-25;
Luk 22:7-14, 21-23; Yoh 13:21-30*

¹²Nohatomo oleo katanda'ano hohaea'a Roti Pata Koragi'ano. Ne oleo ana'a kaneando miendo Yahudi desumbele dhumba Paska. Dadi'anomo anaguhu'ino Yesus dofeenamo ambado, “Guru, ne amai bhahaa gaomua taefotoka so dapoharora'ao Paska?” ¹³Maka Yesus netudu dohodua anaguhuno, ambano “Kalaomu we kota, ne watu po'awa'ao'omu seemie bhe kasodano kai'ino. Angkafie'omu!

^a 14:3 Sakotu'uno o kabuto-butolo ini nomai'ao ne kontu kapute nekonando pualam.

¹⁴Namesua kaowu ne lambu, pugau'omu ne kolambuno putae, 'O guru nofeena'ao bhaha'i boloku amai so napoharao'ao Paska bhe anaguhu'ino?' ¹⁵Anoa namosusuangkoomu boloku bhalano te wawo. Boloku ana'a nosangkamo katokanoa. Fotokaemoomu ne itu haroano Paskantoomu!"

¹⁶Anaguhuno hoduanu maitu dokalamo. Dohato we kota dopo'awa'aomo peda pugauno Yesus sa'ituini. Lasao defotoka haroano Paska. ¹⁷Nohondo oleo, Yesus nohatomo bhe anaguhu'ino ompulu hoduanu. ¹⁸Tangasano dengkoha-ngkoha dohumaa, Yesus nopugau-mo ambano, "Amohatokoomu! Naseemie ne olotamiu momaano bhe Idi ini, namowa kanau ne limando kaewa."

¹⁹Dofetingke pugauno na'a, dosabhamo maka see-seemie dofeenaemo, "O idi bhahaa?" ²⁰Tanotobhoosida ambano, "O mie ana'a seemie ne olotamiu ompulu hoduanu ini. Metandano roti weo pihii poowa bhe Idi, anoamo itu. ²¹Daanumo Anano Manusia – Idimo ini – tetewei namate peda tibuhino weo Kitabino anabii, tamaka so mowa kanau ne kaewa maitu natolau kadaino kolauno. Naetaa koemo nolentea te dhunia ini."

Haroano Ompu

14:22-25

*Mat 26:26-29;
Luk 22:15-20; 1Kor 11:23-25*

²²Tangasano dohumaa maitu, Yesus nealamo roti maka nefoampe katumpuno lalo ne Lahata'ala. Pada aitu roti na'a nokeke-bhaemo maka nowa'andae anaguhu'ino poowa nopugau, "Alae'omu maka humaa'eomu, mbadhakumo inia."

²³Pada ana'a nealamo kampoho'u'a, nefoampe toha katumpuno lalo maka nowa'andae anaguhu'ino. Kosasawindo dofoho'u angguru ne kampoho'u'a aitu. ²⁴Yesus nopugaumo toha ambano, "Heakumo inia. Hea aini damotuhue so mie bhahi, somo mekatangkano podhandino Lahata'ala bhe manusia. ²⁵Amohatokoomu! Kotukotu'u paemo aoho'u angguru ampa oleono aoho'u angguru bu'ou, weo Kafopahinta'ano Lahata'ala."

Petrus nagumaga miina namande'ao Yesus

14:26-31

*Mat 26:30-35;
Luk 22:31-34; Yoh 13:36-38*

²⁶Pada delagu-lagu dopudhi Lahata'ala, dokalamo te kabhawono Zaitun. ²⁷Yesus nofohatodamo ambano, "Kosasawimiu itu naohungga

kaparasaemiua sampe humunsa kanau'omu, kapa'amo nandoo tibuhino weo Kitabino anabii peda aini, 'Dhagano dhumba amongkoe, maka gulumano dhumbano datigasa.'^a ²⁸Tamaka amanu kaowu mai'ao ne mate, ama'indulukikoomu we Galilea."

²⁹Ambano Petrus, "Mahingga kosasawindo ini naohungga kaparasaehandaa sampe dahumunsako, tamaka o idi paise."

³⁰Tamaka Yesus nofohatoe ambano, "Amohatoko! Kotu-kotu'u alo aini dua, pae'o nahaa paku nakumakuhua manu, natolu paku-mo gumaga miina mande'a kanaua."

³¹Sedhulu'a dua kakampuu-mpuuno lalono Petrus nopugau, "Mahingga amate bhe hintu, pae sepali'a agumagaa." Anaguhu'ino sigao'ano sanea dua dopugau peda na'a.

Yesus nosambaheha te kaendeano Getsemani

14:32-42

Mat 26:36-46; Luk 22:39-46

³²Yesus bhe anaguhu'ino dohatomo te kaendea konea'ano Getsemani. Nofohatomo anaguhu'ino ambano, "Mengkoha-ngkohao-mu ne ini, nandoo akumala asumambaheha." ³³Petrus, Yakobus bhe Yohanes nosali'ida damangkafie. Notandamo ne itu nosabha sepali'a bhe nokakenda-kenda handano. ³⁴Ambano, "Nokompeaha sepali'a laloku, kao-kaomo amatemo. Mengkoha-ngkohaomu ne ini, mekambotoomu bhe kodhagaomu!" ³⁵Yesus nopansuhu te wise seendai maka nolongko ne wite bhe nosambaheha. Nesalo ane naembali tempono kakadee-dee amaitu tanalumaloi'e. ³⁶Ambano, "O Aba,^b Amaku, saneaembali'ano so Hintu. Fogampi kanau kampoho'u'a so kafoho'u'aku ini. Ampamo kaowu koise angkafi kapoindalokua, tamaka ta'ampamo kapoindalomu."

³⁷Pada ana'a nosulimo se anaguhu'ino, gaha'a nohatofida doodomu. Nopugaumu ne Petrus ambano, "Simon, moodo gaha'a? Pae tumahamiea bhahaa mekamboto nasedhamua? ³⁸Mekambotoomu bhe sambaheha'omu, keana nokantibhakoomu kasoba. Daanumo totono lalo neangka, tamaka o mbadha nonale."

³⁹Nofendua nokala maka nosambaheha toha, nopototo bhe sambaheano sa'ituini. ⁴⁰Hato nosuli gaha'a nohafotida doodomu toha, hampano dempaumo sepali'a. Miinamo damande'aanea damugau'ao ae ne Yesus. ⁴¹Tolu paku kaowu nosulikida, nopugaumu ambano, "Moodomoomu bhe fewulemoomu. Netaamo! Nohatomo

^a 14:27 Zak 13:7

^b 14:36 Aba maitu wamba Ibrani; ma'anano ama.

tempono. Anano Manusia – Idimo ini – damowaemo ne limando mie kodhosa. ⁴²Ehemoomu, dokalaanaomu. O mie mowa kanau ne limando kaewa noma'omo nahumato.”

Yesus dohakoe

14:43-52

Mat 26:47-56;

Luk 22:47-53; Yoh 18:1-11

⁴³Tangasano Yesus nopugau, nohatomo Yudas, seemie mai'aono ne anaguhuno ompulu hoduanu. Yudas maitu nohato nopoowa bhe mie bhahi metaguno kampue bhe kawangku. Mie bhahi na'a dotududa neangka'indo imamu, pande-pande Kitabi bhe kamungkula'i. ⁴⁴Yudas padamo nofohatoanda tanda peda aini, “O mie so newonoku, anoamo itu. Hakomoomu, wowo'oe'omu tamaka fekataa dhaganie'omua.”

⁴⁵Sahatono, Yudas noma'otimo Yesus bhe nopugau ambano, “Guru!” poowa nowonoe. ⁴⁶Mie bhahi lasao dointaha Yesus maka dotapue. ⁴⁷Nandoo seemie [anaguhuno] nobuna kampueno maka notowe bhatuano Imamu Bhalano, nondawu bhe tingalano. ⁴⁸Yesus nofeenadamo ambano, “Kona kanau'omu mie modai gaha'a? Noafa gaha'a tabeano metaguomu kampue bhe kawangku maka humako kanau'omu? ⁴⁹Ingka se'o-se'oleo afofina'u weo Lambuno Lahata'ala ne wisemiu, tamaka miina humako kanau'omu. Kapeda'ano na'a somo nako'ula'ao tibunino weo Kitabino anabii.” ⁵⁰Pada aitu anaguhu'ino dopuli dofilei, dohunsae tanomoisa.

⁵¹Nandoo dua seemie ana'i mo'ane noangkafi Yesus. Pakeano tanewawe'imo setuwu kamoohu. Patudhundo anoa ini dahumakoe dua. ⁵²Gaha'a tanofosipuli pakeano na'a maka nofilei kalembilembi.

Yesus ne wiseno Sahano Agama

14:53-56

Mat 26:57-68; Luk 22:54-55,

63-71; Yoh 18:12-14, 19-24

⁵³Pada ana'a Yesus doowaemo we lambuno Imamu Bhalano. Kosasawindo neangka'indo imamu, kamungkula'i bhe pande-pande Kitabi dohompu ne itu. ⁵⁴Petrus noangka-angka ngkodo'o Yesus, ampa nopesua weo kadeteno lambuno Imamu Bhalano. Ne itu nengkoha-ngkoha bhe dhumagano poowa nehana. ⁵⁵Neangka'indo imamu bhe kosasawindo Sahano Agama de'ondofi sakusii so sumangkatie, nomuda'ao dabhotusie damongkoe, tamaka miina

dae'awaa. ⁵⁶Dobhahi mie depaha-paha dosangkatie, tamaka pugau-ndo miina napokanti-kantibhaa.

⁵⁷Pada ana'a doehemo dua seemie hodua maka depaha-paha dosangkatie ambado, ⁵⁸“Insaodi padamo tafetingkee nopugau, ‘Ahumunggae lambuno Lahata'ala kahabu'ando manusia ini, maka natolu oleo aefoehemo sigao'ano, suano kahabu'ando manusia.’” ⁵⁹Mahinggamo peda na'a pugaundo daa-daa'e miina napokanti-kantibhaa.

⁶⁰Nopalusi ana'a noehemo Imamu Bhalano ne wunta-wunta-ndo, maka nofeena Yesus ambano, “Pae tumobhoosiea gaha'a kasangkatindo ne hintu ini?”

⁶¹Tamaka Yesus miina nakodiua, miina sepali'a natumobhoosia. Imamu Bhalano maitu nofendua nofeenae ambano, “Nokotu'u hintumo ini Mesias, Anano Lahata'ala tipudhino?” ⁶²“Anoamo,” ambano Yesus, “maka mada kaowu, mohaomu Anano Manusia – Idimo ini – naengkoha ne suanano Lahata'ala kokuasano, mo-hae'omu dua namai te wunta-wuntano olu te lani.”^a

⁶³Imamu Bhalano lasao nopobhensi'ao pakeano bhe nopugau, “So dua ae de'ondofi'ao sakusii gaha'a? ⁶⁴Ingka dofetingkeemoo-mu nopototo'ao wutono bhe Lahata'ala. Peda amai fekihimiu?” Maka kosasawindo dosesuahamo, dohotusiemo tetewei damongkoe.

⁶⁵Pada aitu siga'a dokapehasiemo, dodampu matano maka do-tumbusie poowa dofeenae ambado, “O anabii, soba bhoto no-tumbuko la'ae!” Sampe mie dhumagano detofalimo dua.

Petrus nogagai'e miina namande'ao Yesus

14:66-72

Mat 26:69-75;

Luk 22:56-62; Yoh 18:15-18, 25-27

⁶⁶Tangasano Petrus nengkoha-ngkoha ne kadete, nomaimo seemie hobhine bhatuano Imamu Bhalano. ⁶⁷Sanowoha Petrus nehana, nofoti-fotindamo ulano maka nofeenae ambano, “Ingka hintu ini sadhia pobhai bhe Yesus, miendo Nasaret maitu?”

⁶⁸Tamaka Petrus nogaga ambano, “Miina amande'aanea, miina alumosangiea pugaumu na'aa.” Pada aitu nogampimo se fointono kadete. [Nopobutu nokakuhua manu.]

^a 14:62 Mzm 110:1; Dan 7:13

⁶⁹Nowohae toha ne itu, o bhatua hobhine sa'itu nopugaumo ne mie meehe-eheno ne itu, "Mie aini seemie dua sabhangkando." ⁷⁰Tamaka Petrus nogaga toha. Miina naomponaa mie ne itu dopugaumo, ambado, "Nokotu'u hintu ini sabhangka'indomo, kapa'amo hintu ini mieno Galilea." ⁷¹Petrus nofemata bhe nobhatata'iao wutono ambano "Kotu-kotu'u miina sepali'a amande'aanea mie nesambi-sambilimiu itua!" ⁷²Gaha'a nopobutu nokakuhua toha manu. Petrus lasao nofe'ulai pugauno Yesus ne anoa, "Pae'o nahaa paku nakumakuhua manu, natolu pakumo gumaga miina mande'a kanaua." Maka no'ae, tanokansodu-nsodumo.

Yesus ne wiseno Pilatus

15:1-15

Mat 27:1-2, 11-26;

Luk 23:1-5, 13-25; Yoh 18:28-19:16

15 Nohaha kamentae neangka'indo imam, kamu-kamungku-la'i, pande-pande Kitabi bhe kosasawindo Sahano Agama nose'isemo fekihindo. Yesus dotapuemu maka doowae ne wiseno Pilatus. ²Pilatus nofeenae ambano, "Nokotu'u hintu inia omputo miendo Yahudi?" "Pedamo pugaumu na'a," ambano Yesus. ³Nobhahi sepali'a kasangkati nesungku'aondo neangka'indo imam na'a. ⁴Pilatus nofeenaemo toha ambano, "Pae tumobhoosia gaha'a? Ingka fetingkee na'a kabhahino kasangkatindo ne hintu!" ⁵Tamaka Yesus miina sepali'a natumobhoosia, sampe Pilatus tanomente.

⁶Kaneano ne hohaea'a peda na'a Pilatus sadhia nefolimba seemie katohongku, ampa kamesalondo mie bhahi. ⁷Ne na'a nandoo seemie konea'ano Barabas, notitohongku bhe sabhangka'ino mba'ino dehabu kahungga weo liwu doewangi pamarinta. Weo kahungga ana'a andoa dofopongko. ⁸Dohato mie bhahi desalomo ne Pilatus so namangkafi'ao kaneano maitu. ⁹Pilatus notobhoosida ambano "Poindaloomu bhahaa amolimbaangkoomu omputomiu ini?" ¹⁰Kapa'amo Pilatus nopande'aane neangka'indo imam doowa Yesus se anoa hampano dokondua'ane lalo. ¹¹Tamaka neangka'indo imam lasao dowudhu mie bhahi daesalo ne Pilatus namolimbanda Barabas. ¹²Pilatus nofeenadamo toha ambano, "Ane peda na'a amafa'iane mie nekonamiu omputo miendo Yahudi ini?" ¹³Mie bhahi dokei ambado, "Dakumantai'e te sau salipu!" ¹⁴"Podiu modai ae gaha'a nehabunoo?" ambano toha Pilatus. Tanodhulu ka'osa dokei ambado, "Dakumantai'e te sau salipu!"

¹⁵Panda-pandano Pilatus nofolimbamo Barabas do'ia'ao kaowu mie bhahi maitu. Pada aitu Yesus dohambisianemo habuta maka nowa'andae dakumantai'e te sau salipu

Yesus doele-elee

15:16-20

Mat 27:27-31; Yoh 19:2-3

¹⁶Pada peda na'a, tantara doowamo Yesus we kamali kae-bhotusi'a parakara. Maka kosasawindo tantara dosali'ida dapofofofonu. ¹⁷Yesus dofopakeane dhuba wungo, pada aitu dekinianemo songkono omputo mai'ao ne ha'ano sau kokihi maka dofokanae ne fotuno. ¹⁸Pada ana'a dopahasomba-sombai'emo ambado, "Somba waompu, Omputo miendo Yahudi!" ¹⁹Fotuno dohambisiane wulu, dokapehasie bhe dosudhu ne wiseno dotaohao sambado. ²⁰Pada doele-elee peda na'a, dhuba wungo sa'ituini dolembiemo maka dofopakeane toha pakeano wutono. Nopalusi ana'a dofolimbamo, dakumalamo dakumantai'e te sau salipu.

Yesus dokantai'e te sau salipu

15:21-32

Mat 27:32-44;

Luk 23:26, 33-43; Yoh 19:17-24

²¹We laano sala nandoo seemie lumalono konea'ano Simon. Simon ini miendo Kirene, amando Aleksander bhe Rufus. Anoa ini kane'o nosuli nomai'ao we simbalino kota, lasao dofosuhue natumongku sau salipuno Yesus. ²²Yesus doowae te kabhawo nekonando Golgota; ma'anano ka'uada. ²³Dohato ne itu dowanemo angguru dosaloane kaago nekonando mur, tamaka Yesus nongahe naoho'u.

²⁴Pada ana'a dokantai'emo te sau salipu. Pakeano dopodawudawue; mbali notipande'aoane dawuno see-seemie, dopodaduane. ²⁵Tempo katisalipu'ano na'a hambi siua mata hangkowane. ²⁶Tingku-kuno katisalipu'ano dohubie maka dofopikae te salipuno. Kabuhino peda ini, "OMPUTO MIENDO YAHUDI". ²⁷Nandoo dua dohodua mie modai nekantaindo te sau salipu, seemie ne kemano, seemie ne suanano. ²⁸[Maka noko'ulamo tibunino weo Kitabino anabii putae "Anoa natilentu mie modai." ^a]

²⁹Mie lumalono ne itu do'umbue bhe dofoule-ule fotundo ambado, "Alee, hintumo ini gaha'a so humungano Lambuno Lahata'ala

^a 15:28 Yes 53:12

maka ne katolu oleono moeheemo toha! ³⁰Soba fosalamatati wuto-
mu, sampu'o toha mai'ao te salipu itu!"

³¹Pedamo dua aitu neangka'indo imamu bhe pande-pande Kitabi
doele-eele bhe dopugau sapada-pada andoa ambado, "Mie si-
gao'ano nofosalamatida, gaha'a itu wutono miina namooliea! ³²Nae-
taa Mesias, Omputo Israel Fosalamatino maitu, nasumampumo na-
mai'ao te sau salipu, dowoha'ao bhe doparasaea'ao." Mahingga mie
hoduano tisalipuno ne sohihino dowambakie dua.

Kamate'ano Yesus

15:33-41

Mat 27:45-56;

Luk 23:44-49; Yoh 19:28-30

³³No'indotu oleo kosekadie'ae na'a nohohondomo ampa hambi
tolu mata. ³⁴Hambi tolu mata, Yesus nolo'oimo nofekandii-ndii
ambano, "Eloi, Eloi, lama sabaktani?" Ma'anano, "Lahata'alaku,
Lahata'alaku, noafa hunsa kanau'ao?"^a ³⁵Dofetingke peda na'a,
seemie hodua mie meehe-eheno ne itu dopugaumo ambado, "Fe-
tingke kaitaomu, nolo'oi anabii Elia!" ³⁶Seemie lasao nelondo
kapa^b weo angguru mokolo. Kapa maitu notei'e ne wulu maka
nofefoho'utiane Yesus, poowa nopugau ambano, "Hunsa'aonomo!
Soba da'umondo-ondoe bhaha'i kaowua namai Elia namosampue."
³⁷Pada aitu Yesus nokei'aomo pandano nafasi maka nobhotu.

³⁸Wakutuu ana'amo dua kai bhalano mbali kahondomi weo
Lambuno Lahata'ala nopobhensi nomai'ao te wawo ampa we panda.^c

³⁹Neangkando tantara meehe-eheno te wiseno nowoha kaowu
mateno Yesus peda maitu, nopugaumo ambano, "Kotu-kotu'u mie
aini Anano Lahata'ala!"

⁴⁰Nandoo dua hobhine'i umondono we kodo'ono. Ne olotando
hobhine'i maitu, nandoo Maria Magdalena, Salome bhe Maria
inando Yakobus mohangku'ano dadi bhe Yoses. ⁴¹Andoa ini no-
tanda we Galilea doangkafimo Yesus mbali umondofaono ka-
faraluuno. Ne itu dobhahi dua hobhine sigao'ano humatono we
Yerusalem dopoowa-owa bhe Yesus.

^a 15:34 Mzm 22:1

^b 15:36 Sakotu'uno: *spons*, kambeano pasi motatano.

^c 15:38 Kel 26:31-33

Yesus dokobuhue

15:42-47

*Mat 27:57-61;
Luk 23:50-56; Yoh 19:38-42*

⁴²Oleo nohondomo. Oleo aitu kaefotoka'a oleono Sabat, mba'ino nomo namentae matanomo. ⁴³Seemie konea'ano Yusuf tanofekatangkamo lalono nokala nesalo maeatino Yesus ne Pilatus. Yusuf ini mieno Arimatea, seemie kamungkula tiangka, nopesua dua Sahano Agama. Anoa neantagi dua kahato'ano Kafopahinta'ano Lahata'ala. ⁴⁴Pilatus namente nofetingke Yesus nomatemo, lasao nelo'oi neangcando tantara maka nofeenae bhaha'i nokotu'u Yesus nomatemo. ⁴⁵Nofetingke kaowu bhihita kahato'aono neangcando tantara maitu, Pilatus no'unda'aanemo maeatino Yesus namalae Yusuf. ⁴⁶Pada aitu Yusuf ne'olimo bhalatu mo'alusu maka nofosampu maeatino Yesus mai'ao te sau salipu. Pada ana'a nowaluanemo bhalatu sa'ituini maka nofopesua'e weo kobuhu. Kobuhu ana'a dopatotae ne kabhawono kontu, dohabue peda katuno lia. Mbali kasongkono wobhano lia na'a, nodoleane kontu bhalano. ⁴⁷Katifondole'ano Yesus maitu, dowohae dua Maria Magdalena bhe Maria inano Yoses.

Kawanu'ano Yesus nomai'ao ne mate

16:1-8

*Mat 28:1-10;
Luk 24:1-12; Yoh 20:1-10*

16 Nopalusi oleono Sabat, Maria Magdalena, Salome bhe Maria inano Yakobus, dokalamo de'oli mina-mina. Patudhundo dakumala daminaki maeatino Yesus. ²Ne oleono Ahadhi sameantaeno, oleo kabhao-bhaono weo ahadhi aitu, nofoni oleo dokalamo we kobuhu. ³We laano sala tadopofee-feenamo ambado, "La'ae bhahaa so fotulumino dadumole kontu kasongkono kobuhu?" Kapa'amo kontu ana'a nobhala sepali'a. ⁴Dohato we kobuhu, gaha'a dowohamo kontu bhalano na'a notidolemo. ⁵Nelaa dopesua weo liano kobuhu na'a, dowohamo seemie ana'i mo'ane nepake dhuba kapute, nengkoha-ngkoha humanda we suana. Andoa dokohedu sepali'a. ⁶Tamaka ambano mie na'a, "Koe mote'iomua! Apende'aanemo ingka ondofiomu Yesus miendo Nasaret, tikantaino te sau salipu. Miinamo bhe Anoa ne ini, nowanumo! Ondoe'omu katifondole'ano ini!" ⁷Aitu sulimoomu, maka fohatodaomu anaguhu'ino, fohatoe'omu dua bhe Petrus, putae Yesus nopa'indulukikoomu

we Galilea. Ne watu mohaemoomu peda pugauno endefi'ini ne hintimiu.”

⁸Pada ana'a lasao dolimba mai'ao weo liano kobuhu maka dofilei, mba'inomo dote'i sepali'a bhe noguguda. Ka'osano kate'indo, miina sepali'a daetula-tula ne mie sigao'ano.^a

Yesus nobhahi pakuno nofotiwoha wutono ne anaguhu'ino
16:9-18

⁹[Nowanu kaowu, ne oleono Ahadhi kahangkowineno, kabhao-bhaono Yesus nofotiwoha Wutono ne Maria Magdalena. Nomai'ao ne Maria ini, Yesus padamo nefolimba fitu bansa seetani. ¹⁰Hobhine aitu lasao nokala nofohato sabhangka'ino Yesus. Andoa ini tangasano noguguhu lalondo bhe do'ae. ¹¹Wakutuuno do-fetingke Yesus nodadi toha, pakade padamo nowohae Maria Magdalena, andoa miina damarasaea.

¹²Pada ana'a Yesus nofotiwoha dua Wutono ne anaguhuno dohodua, tangasano dokala we simbalino kota; ulano segaati'a dua. ¹³Kohoduando ini lasao dosuli dofohato sabhangka'indo, tamaka miina dua damarasaeada.

¹⁴Panda-pandano Yesus nofotiwoha Wutono ne anaguhu'ino koompulu seemiendo, tangasano dohumaa. Nofe'alada mba'inomo miina damarasaea, pakade notu'a fotundo sampe dongahe damarasaea ne mie mohae nopalusi kawanu'ano. ¹⁵Pada aitu Yesus nofohatodamo ambano, “Kalaomu ne amai liwu ne dhunia ini maka foleleomu Bhihita Metaa ne kosasawindo manusia! ¹⁶Ane damarasaea bhe dakumadiuda, dasumalamati; tamaka ane pae damarasaea dae'awa kahukumu. ¹⁷Mie marasaeano ne Idi nae- mbali daehabu tanda tapa mentela: daefolimba seetani damake neaku; damande dua dapugau'ao sabhaha wamba bu'ou. ¹⁸Ane daeintaha ule bhaha'i daoho'u hasu, pae dae'awa balaa. Ane da-tumei limando te wawono mie mosaki, mosakino aitu nao'osa.”

^a **16:8** Nandoo dua kitabino Bhihita Metaa nebhino Markus bhe aeati katu- bhahino peda aini: *Tadofosampemo kaowu seendai kaowili sa'ituini ne Petrus bhe sabhangka'ino. Nopalusi ana'a Yesus wutono notudu anaguhu'ino daefolele Bhihita Metaa notanda te mata oleo ampa we kansoopa. Bhihita Metaa nefolelendo ini nongkilo bhe pae nabinasaa, somo meowano kasalamati suhue dhamani.*

Yesus notisangke te surugaa**16:19-20***Luk 24:50-53; Tul 1:9-11*

¹⁹Pada nopugau peda ana'a, Ompu Yesus notisangkemo te surugaa maka nengkoha ne suanano Lahata'ala. ²⁰Pada ana'a anaguhu'ino dokalamo defolele Bihita Metaa ne amai liwu ne dhunia ini. Ompu noposabhangkaanda kansuhu, bhihita nefolele-ndo nofekatangkaane tanda-tanda tapa mentela.]